

SADRŽAJ

DEFINICIJE

I OPŠTE ODREDBE

II REGISTRACIJA KLUBOVA

III REGISTRACIJA IGRAČA

1. Opšte odredbe
2. Organi za registraciju igrača
3. Organi za ovjeru i objavu registracija igrača
4. Registracijski periodi (prelazni rokovi)
5. Neregistrovani igrači
6. Registracija i izvještavanje o maloljetnim igračima u akademijama
7. Probe
8. Registracija igrača koji dolaze iz inostranih klubova
9. Preregistracija
10. Registracija bez ispisnice i brisovnice
11. Certifikat o međunarodnom transferu (ITC)
 - 11.1 Izdavanje ITC-a za igrača profesionalca
 - 11.2 Izdavanje ITC-a za igrača amatera
 - 11.3 Izdavanje IFTC-a
12. Ustupanje profesionalnog igrača

IV POSEBNE ODREDBE VEZANE ZA DOKUMENTACIJU POTREBNU ZA REGISTRACIJU IGRAČA

1. Predmet registracije
2. Obrasci za registraciju
3. Prijava za registraciju
4. Ispisnica
5. Brisovnica
6. Pasoš igrača

V OBJAVA REGISTRACIJE

VI PRAVO NASTUPA

VII PROMJENA KLUBA

1. Pravo na promjenu kluba
2. Odustajanje od promjene kluba

VIII ZAŠTITA MALOLJETNIH IGRAČA

IX STATUS IGRAČA

1. Igrači amateri
2. Profesionalni igrači
3. Zaključivanje ugovora sa profesionalnim igračima
4. Verifikacija ugovora
5. Prestanak aktivnosti
6. Vraćanje amaterskog statusa

X ODRŽAVANJE UGOVORNE STABILNOSTI IZMEĐU PROFESIONALNIH IGRAČA I KLUBOVA

1. Poštivanje ugovora
2. Sporazumni raskid ugovora
3. Raskid ugovora iz opravdanih razloga
4. Posljedice raskida ugovora bez opravdanog razloga
5. Raskid ugovora iz sportski opravdanih razloga
6. Jednostrani raskid ugovora
7. Zaštićeno razdoblje
8. Dospjele novčane obaveze kluba
9. Posebne odredbe vezane za ugovore i status igračica

XI UTICAJ TREĆE STRANE NA KLUBOVE I VLASNIŠTVO IGRAČEVIH EKONOMSIH PRAVA

XII NAKNADA ZA TRENIRANJE IGRAČA

XIII MEHANIZAM SOLIDARNOSTI

1. Solidarni doprinos

XIV RJEŠAVANJE SPOROVA

1. Sporovi u vezi sa registracijom igrača

2. Sporovi u vezi sa ugovorima

3. Sporovi po osnovu zahtjeva za isplatu naknade treniranje igrača

4. Zajedničke odredbe vezane za prvostepene i drugostepene postupke pred nadležnim organima

XV ZAHTJEV ZA ZAŠTITU ZAKONITOSTI PRIMJENE PRAVILNIKA

XVI ODREDBE O FUTSALU

XVII ODREDBE O ŽENSKOM NOGOMETU/FUDBALU

XVIII PUŠTANJE IGRAČA ZA REPREZENTATIVNE EKIPE

XIX PRELAZNE I ZAVRŠNE ODREDBE

DEFINICIJE:

- 1. Dosadašnji savez:** Savez kojem je pridružen dosadašnji klub
- 2. Dosadašnji klub:** Klub iz kojeg igrač prelazi u novi klub
- 3. Novi savez:** Savez kojem je pridružen novi klub
- 4. Novi klub:** Klub u koji igrač prelazi iz dosadašnjeg kluba
- 5. Službene utakmice:** Utakmice koje se igraju u okviru organizovanog nogometa/fudbala, kao što su nacionalna prvenstva, nacionalni kupovi i međunarodna prvenstva za klubove. Pod službenim utakmicama ne podrazumijevaju se prijateljske i probne utakmice
- 6. Organizovani nogomet/fudbal:** Nogomet/fudbal organizovan pod nadležnošću FIFA-e, konfederacija i saveza ili organizacija koje su ovlaštene od istih
- 7. Zaštićeni periodi:** Period od tri cjelokupne sezone ili tri godine, u zavisnosti od toga šta prije nastupa, po stupanju na snagu ugovora, ukoliko je takav ugovor sačinjen prije 28. rođendana profesionalnog igrača, ili period od dvije cjelokupne sezone ili dvije godine, u zavisnosti od toga šta prije nastupa, po stupanju na snagu ugovora, ukoliko je takav ugovor sačinjen nakon 28. rođendana profesionalnog igrača
- 8. Registracijski periodi (prelazni rokovi):** Periodi određeni u skladu sa članom 14. ovog Pravilnika
- 9. Sezona:** Period od uzastopnih 12 mjeseci koji je utvrdio Savez, a tokom kojeg perioda se odigravaju njegova službena takmičenja kao što su nacionalna prvenstva, liga i kup takmičenja
- 10. Naknada za treniranje:** Isplate koje se vrše u cilju finansiranja razvoja mladih igrača
- 11. Maloljetni igrač:** Igrač koji nije navršio 18 godina
- 12. Akademija:** Organizacija ili nezavisni pravni subjekat čiji je primarni dugoročni cilj da igračima obezbijedi dugoročan trening kroz osiguranje neophodnih objekata za treniranje i infrastrukture. To prvenstveno uključuje, ali nije ograničeno na centre za treniranje nogometa/fudbala, nogometne/fudbalske kampove, nogometne/fudbalske škole itd.
- 13. Sistem usklađivanja transfera (TMS – Transfer Matchig System):** Sistem usklađivanja transfera (TMS) je elektronički informacioni sistem s primarnim ciljem pojednostavljenja procesa međunarodnih transfera igrača te unaprjeđenja transparentnosti i protoka informacija i podataka, koji je regulisan FIFA Pravilnikom o statusu i transferu igrača
- 14. COMET informacioni sistem:** Elektronički informacioni sistem putem kojeg se obavljaju registracije klubova i igrača u Bosni i Hercegovini
- 15. ITC:** Međunarodna dozvola o transferu
- 16. IFTC:** Međunarodna dozvola o transferu igrača futsala
- 17. Treća strana:** Strana različita od klubova između kojih se vrši transfer igrača, ili bilo kojeg prethodnog kluba za kojeg je igrač bio registrovan

18. Nogomet/Fudbal 11 igrača (Eleven-a-side football): Nogomet/fudbal koji se igra u skladu sa zakonima igre koje je odobrio IFAB

19. Futsal: Nogomet/fudbal koji se igra u skladu s Pravilima igre Futsal, koji je izradila FIFA u saradnji s Potkomitetom IFAB-a

20. FIFA Connect ID sistem: usluga koju osigurava FIFA za dodjeljivanje globalno valjanih i jedinstvenih identifikacijskih oznaka (FIFA ID), pojedincima, organizacijama te objektima, pri čemu se osiguravaju informacije o duplikatima u slučaju druge registracije istog pravnog subjekta te vodi centralni registar o postojećim registracijama svih pravnih subjekata koji imaju dodijeljenu FIFA-inu identifikacijsku oznaku

21. FIFA-ina identifikacijska oznaka (FIFA ID): Jedinstvena identifikacijska oznaka na području cijelog svijeta koji FIFA Connect ID sistem dodjeljuje svakom klubu, savezu, igraču i nogometnom/fudbalskom zastupniku

22. Međunarodni transfer: Prelaz igrača iz kluba jednog saveza u klub drugog saveza

23. Domaći transfer: Prelaz igrača iz jednog kluba u novi i različiti klub unutar istog saveza

24. Premosni transfer: Bilo koja dva domaća ili međunarodna uzastopna transfera istog igrača, koji su povezani jedan s drugim i koji obuhvataju registraciju tog igrača za neki srednji klub s ciljem izbjegavanja primjene relevantnih pravilnika ili zakona i/ili s ciljem prevare druge osobe ili pravnog subjekta

25. Porodiljsko odsustvo: Period od najmanje 14 sedmica plaćenog odsustva koji se omogućava igračici zbog trudnoće, od čega najmanje osam sedmica mora koristiti nakon poroda.

26. Igrač treniran u klubu: igrač koji je između 15. godine (ili početka sezone u kojoj navršava 15 godina) i 21. godine (ili završetka sezone u kojoj navršava 21 godinu), te bez obzira na njegovo državljanstvo i dob, registrovan za svoj sadašnji klub (neprekidno ili ne) tokom perioda od tri cjelokupne sezone ili 36 mjeseci.

27. Proba: Privremeni period tokom kojeg klub obavlja procjenu igrača koji nije registrovan za taj klub.

28. Takmičarski period: Period koje počinje s prvom službenom utakmicom prvenstva nacionalne lige ili kupa (ovisno od toga šta prvo nastupi) te završava s posljednjom službenom utakmicom koja se igra u sklopu tih takmičenja.

Na osnovu članova 39. i 40. Statuta Nogometnog/Fudbalskog Saveza Bosne i Hercegovine i u skladu sa FIFA Pravilnikom o statusu i transferu igrača usvojenim dana 15.05.2024. godine, a koji je stupio na snagu dana 01.06.2024. godine, Komitet za hitnost Nogometnog/Fudbalskog saveza BiH na sjednici održanoj dana 20.08.2024. godine d o n o s i

P R A V I L N I K

o registracijama klubova i igrača i statusu i transferu igrača

I OPŠTE ODREDBE

Član 1.

(1) Ovim Pravilnikom uređuju se opšta i obavezujuća pravila koja se tiču pitanja registracije klubova i igrača (nogomet/fudbal, futsal i ženski nogomet/fudbal), postupak promjene kluba, status igrača, uslovi zaključenja ugovora između klubova i igrača, sticanje prava nastupa, opšti uslovi za naknade za treniranje i razvoj igrača, odredbe u vezi rješavanja sporova, kao i druga pitanja u vezi sa statusom i transferom igrača i registracijama klubova i igrača.

(2) Svi izrazi napisani u muškom gramatičkom rodu, jednako se i bez diskriminacije odnose na osobe oba spola.

Član 2.

Odredbe ovog Pravilnika obavezne su za sve saveze, klubove i igrače u Bosni i Hercegovini.

II REGISTRACIJA KLUBOVA

Član 3.

(1) Članovi Nogometnog/Fudbalskog saveza BiH (u daljem tekstu: NS/FS BiH) donose odluke o davanju registracione nadležnosti savezima, a verifikuje ih Izvršni odbor NS/FS BiH.

(2) Uslovi koji moraju biti ispunjeni da bi savez mogao imati registracionu nadležnost propisani su Pravilnikom o uslovima koje moraju ispunjavati registracioni savezi za vršenje registracija klubova i igrača na teritoriji NS/FS BiH.

(3) Nadležni registracioni savez će ovlastiti nadležni organ za provođenje postupka registracije klubova (u daljem tekstu: nadležni organ za registraciju klubova).

Član 4.

(1) Prijava za registraciju klubova podnosi se nadležnom organu nadležnog registracionog saveza, koji odlučuje o predmetu registracije kluba.

(2) Registracije se provode po proceduri propisanoj ovim Pravilnikom i to:

- a) Nogometnih/fudbalskih klubova,
- b) Futsal klubova,
- c) Ženskih nogometnih/fudbalskih klubova.

Član 5.

(1) Da bi klub postao član NS/FS BiH, potrebno je da ispunjava slijedeće uslove:

- a) Da nadležnom registracionom savezu podnese zahtjev za registraciju i prijem u članstvo, u kojoj se obavezuje da će poslovati u skladu sa Statutom, pravilnicima i odlukama nadležnih tijela NS/FS BiH i njegovih članova,
- b) Da dostavi rješenje nadležnog organa da mu je odobren rad i da je registrovan kod nadležnog državnog (entitetskog) organa,
- c) Da priloži (ovjeren) prepis statuta i rješenje nadležnog organa o ovlaštenom licu/licima za predstavljanje i zastupanje kluba,
- d) Da uplati upisninu i članarinu, čiju visinu određuje nadležni savez za registraciju;
- e) Da registruje najmanje 20 (dvadeset) igrača za klub nogometa/fudbala, ili najmanje 10 (deset) igrača za klub futsala, odnosno najmanje 15 (petnaest) igrača za klub ženskog nogometa/fudbala,
- f) Da ima vlastiti ili ugovorom obezbijeđen stadion, odnosno, dvoranu za futsal.

(2) Nadležni organ za registraciju klubova neće registrovati klub ukoliko ne ispunjava uslove iz predhodnog stava, ako statut kluba nije u skladu sa Statutom NS/FS BiH i statutima njegovih članova, kao i ukoliko prijavi naziv kluba pod kojim je neki drugi klub već registrovan u istom mjestu.

(3) Nadležni organ za registraciju klubova je dužan voditi registraciju klubova putem COMET informacionog sistema.

(4) Nadležni organ za registraciju klubova je dužan da prilikom registracije kluba, u COMET informacioni sistem unese dokumenta iz stava (1) tačke b) ovog člana te stava (1) tačke c) ovog člana isključujući ovjeren prepis statuta.

Član 6.

(1) Klub može promijeniti naziv najkasnije 30 (trideset) dana prije početka takmičenja/prvenstva.

(2) U slučaju promjene naziva, klub je dužan dostaviti sljedeće dokaze:

- a) Zahtjev nadležnom registracionom savezu, kako je navedeno u članu 6. stavu (1) tački a);
- b) Rješenje o upisu promjene naziva kluba u registar nadležnog državnog (entitetskog) organa;
- c) Ovjerena kopija Statuta sa promijenjenim nazivom kluba;
- d) Dokaz o uplatiti upisnine i članarine u vezi sa promjenom naziva kluba.

(3) Odluka o promjeni naziva kluba obavezno se objavljuje u službenom glasniku nadležnog registracionog saveza.

Član 7.

(1) Klubovi se mogu spajati pod uslovom da su njihova sjedišta unutar istog područnog/kantonalnog/županijskog nogometnog/fudbalskog saveza, kao i u skladu sa ovim Pravilnikom i Pravilnikom o nogometnim/fudbalskim takmičenjima.

(2) Ako jedan od klubova u spajanju zadržava naziv, objavljuje se prestanak rada drugog kluba.

(3) U slučaju spajanja dva kluba, kada se dodjeljuje novi naziv klubu, klubovi koji se spajaju dužni su prijaviti prestanak rada i provesti postupak registracije novog kluba na način kako je predviđeno članom 6. stavom (1) ovog Pravilnika.

(4) Ukoliko klub ima sponzora, za vrijeme koje je određeno ugovorom o sponzorstvu, uz

ime kluba može dodati i ime sponzora. U tom slučaju ime sponzora uz ime kluba prijaviće se nadležnom takmičarskom organu, a dopuna naziva kluba neće se posebno registrovati po odredbama ovog Pravilnika.

Član 8.

(1) Klub postaje član NS/FS BiH kada nadležni organ za registraciju klubova donese odluku o ispunjenosti svih propisanih uslova za prijem kluba u članstvo, te odluku o prijemu u članstvo objavi u službenom glasniku nadležnog registracionog saveza.

(2) Nadležni organ za registraciju klubova je obavezan da objavi odluku o registraciji kluba u službenom glasniku u roku od osam dana od dana donošenja odluke o prijemu kluba u članstvo.

(3) Po izvršenoj registraciji, klub ima pravo da se uključi u prvi naredni ciklus odgovarajućeg prvenstvenog takmičenja.

(4) Klub koji se ne uključi u takmičenje nema pravo sticanja statusnih prava koja proizlaze iz članstva.

Član 9.

(1) Klub se može istovremeno registrovati za futsal, nogomet/fudbal, odnosno ženski nogomet/fudbal, ako ispunjava slijedeće uslove:

- a) Da u molbi za registraciju i prijem u članstvo navede da se registruje za futsal, nogomet/fudbal, odnosno ženski nogomet/fudbal,
- b) Da dostavi rješenje nadležnog organa da mu je odobren rad i da je registrovan kod nadležnog suda, odnosno nadležnog državnog organa,
- c) Da u statutu reguliše članstvo futsala, nogometa/fudbala, odnosno ženskog nogometa/fudbala,
- d) Da registruje najmanje 20 (dvadeset) igrača za nogomet/fudbal i 10 (deset) igrača za futsal, odnosno 15 (petnaest) igrača za ženski nogomet/fudbal,
- e) Da uplati članarinu i upisninu za klubove koje registruje i
- f) Da ima sopstveni ili ugovorom obezbijeđeni stadion za nogomet/fudbal odnosno dvoranu za futsal.

(2) Odluku o registraciji, u smislu stava (1) ovog člana, donosi nadležni organ za registraciju klubova, na način i prema postupku iz člana 5. ovog Pravilnika.

Član 10.

(1) Prestanak članstva kluba u NS/FS BiH ili mirovanje prava kluba iz članstva utvrđuje se odlukom o brisanju iz članstva, odnosno odlukom o zamrzavanju statusnih prava.

(2) Nadležni organ za registraciju klubova donosi odluku iz predhodnog člana, a odluka se objavljuje u službenom glasniku nadležnog registracionog saveza.

III REGISTRACIJA IGRAČA

Član 11.

1. Opšte odredbe

(1) Registracija igrača vrši se putem COMET informacionog sistema koji svakom igraču dodjeljuje FIFA-inu identifikacijsku oznaku prilikom prve registracije.

(2) Da bi igrao za klub, igrač mora biti registrovan ili kao profesionalac ili kao amater.

(3) Samo elektronski registrovani igrači koji se identificiraju s FIFA-inom identifikacijskom oznakom imaju pravo učešća u organizovanom nogometu/fudbalu.

(4) Igrač može biti registrovan za klub samo u svrhu igranja organizovanog nogometa/fudbala. Izuzetno, igrač može biti registrovan za klub čisto iz tehničkih razloga, kako bi se osigurala transparentnost u uzastopnim pojedinačnim transferima, a u skladu sa Aneksom 3. FIFA Pravilnika o statusu i transferima igrača.

(5) Registracije koje se ne provedu putem COMET informacionog sistema su ništave i neće biti objavljene u službanim glasnicima saveza nadležnih za objavu registracija.

(6) Igrač može biti registrovan nakon navršenih šest godina života.

(7) Registracija za igrača predstavlja licencu za igranje nogometa/fudbala.

(8) Igrač može biti registrovan samo za jedan klub iste vrste takmičenja.

(9) Igrač može biti istovremeno registrovan za dva kluba pod uslovom da se radi o klubovima različite vrste nogometnog/fudbalskog takmičenja (nogometa/fudbala, futsala i sl.). Nogometni/fudbalski i futsal klub mogu pripadati različitim nacionalnim nogometnim/fudbalskim savezima. Profesionalni igrači mogu se registrovati za klub druge vrste nogometnih/fudbalskih takmičenja samo ukoliko imaju pisanu saglasnost kluba s kojim imaju zaključen profesionalni ugovor.

(10) Ako igrač koji je registrovan kao amater u oba kluba različitih vrsta nogometnog/fudbalskog takmičenja, naknadno, s jednim od tih klubova, zaključi profesionalni ugovor, treba dobiti od tog kluba pisanu saglasnost u odnosu na postojeću registraciju za klub druge vrste takmičenja. Ukoliko klub ne izda ovu saglasnost, isti ima pravo tražiti poništenje igračeve registracije za klub druge vrste takmičenja.

(11) Činom registracije igrač je prihvatio obavezu i saglasan je da će se pridržavati statuta i akata kluba, propisa NS/FS BiH, FIFA-e i UEFA-e.

(12) U toku jedne sezone, igrači mogu biti registrovani za maksimalno tri kluba ali igrač ima pravo nastupa na službenim utakmicama samo za dva kluba, bez obzira ako je treća registracija izvršena za klub za koji je igrač već ostvario jednu od navedenih registracija.

(13) Izuzetak od pravila iz prethodnog stava je situacija kada igrač koji prelazi iz jednog u drugi, a oba kluba pripadaju savezima čije se sezone takmičenja preklapaju (tj. početak sezone ljeto – jesen, za razliku od zime – proljeće), a kada igrač može imati pravo da nastupa na službenoj utakmici za neki treći klub tokom predmetne sezone, pod uslovom da je u potpunosti ispoštovao svoje ugovorne obaveze prema svom prethodnom klubu, uz obavezu poštivanja odredaba vezanih za registracijske periode i minimalnu dužinu trajanja ugovora.

(14) U svim okolnostima mora se voditi računa o sportskom integritetu takmičenja.

(15) Igrač ne smije igrati službene utakmice za više od dva kluba koja se takmiče u istom prvenstvenom ili kup takmičenju u toku iste sezone.

(16) Svako postupanje protivno stavu (15) ovog člana će biti sankcionisano od strane nadležnih disciplinskih organa.

(17) Ni jedan klub ili igrač neće učestvovati u prenosnom transferu. Pretpostavlja se, osim ako se ne utvrdi suprotno, da su u slučaju dva uzastopna domaća ili međunarodna transfera istog igrača, a koja su se dogodila u razdoblju od 16 (šesnaest) sedmica, strane uključene u ta dva transfera (klubovi i igrač), učestvovala u prenosnom transferu. Nadležna disciplinska komisija će izreći kazne svakoj strani na koje su primjenjivi propisi NS/FS BiH, uključenoj u prenosni transfer, u skladu s Disciplinskim pravilnikom NS/FS BiH.

2. Organi za registraciju igrača

Član 12.

(1) Registraciju igrača vrši nadležni registracioni savez na čijoj teritoriji se nalazi klub za koji se igrač registruje.

(2) Nadležni registracioni savez određuje koji će organ (inokosni ili kolegijalni) vršiti registraciju igrača na njegovoj teritoriji (u daljem tekstu: nadležni organ za registraciju igrača).

Član 13.

(1) Nadležni organ za registraciju igrača donosi odluke po zahtjevu za registraciju igrača.

(2) O zahtjevu za registraciju igrača mora se odlučiti najkasnije u roku od osam dana od dana podnošenja zahtjeva za registraciju.

3. Organi za ovjeru i objavu registracija igrača

(1) Ovjeru i objavu registracija igrača za klubove prvog ranga takmičenja vrši nadležna služba NS/FS BiH.

(2) Ovjeru i objavu registracija igrača drugog i trećeg ranga takmičenja vrše nadležne službe entitetskih saveza (NS FBiH i FSRS).

(3) Ovjeru i objavu registracija klubova ostalih rangova takmičenja vrše nadležne službe nadležnih registracionih saveza.

(4) Ukoliko postoje smetnje za ovjeru, nadležne službe za ovjeru obavještavaju nadležni registracioni savez i klub o istima, a ovjera registracije se neće izvršiti dok se ne otklone uočeni nedostaci.

4. Registracijski periodi (prelazni rokovi)

Član 14.

(1) Igrač može biti registrovan samo tokom registracijskih (prelaznih) perioda utvrđenih od strane Izvršnog odbora NS/FS BiH.

(2) Izvršni odbor NS/FS BiH će utvrditi registracijske periode i to posebno za igrače profesionalce, a posebno za igrače amatere, pod uslovom da je dužna pažnja posvećena integritetu takmičenja.

(3) Prvi registracijski period može započeti prvog dana nakon dana završetka prethodne sezone, a najkasnije prvog dana nove sezone. Ovaj period ne može trajati kraće od osam sedmica niti duže od 12 (dvanaest) sedmica.

(4) Drugi registracijski period utvrđuje se sredinom sezone te ne može trajati kraće od četiri sedmice niti duže od osam sedmica.

(5) Ukupno trajanje oba registracijska perioda ne može biti duže od 16 (šesnaest) sedmica, a trajanje oba registracijska perioda za sezonu će biti unesena u TMS sistem najmanje 12 (dvanaest) mjeseci prije nego što stupe na snagu.

(6) Igrači mogu biti registrovani samo ukoliko je zahtjev kluba valjano podnesen registracionom organu u toku registracijskog perioda i to po sljedećim osnovama:

- a) Registracija igrača koji dolazi iz domaćeg kluba,
- b) Registracija igrača koji dolazi iz inostranog kluba,
- c) Privremena registracija igrača futsala koji dolazi iz inostranog kluba,
- d) Ustupanje igrača.

(7) Izuzetno, igrači mogu biti registrovani izvan registracijskog perioda u sljedećim okolnostima:

- a) Igrač profesionalac koji je jednostrano raskinuo ugovor iz opravdanog razloga ili čiji je ugovor jednostrano raskinut bez opravdanog razloga od strane njegovog kluba, može biti registrovan izvan registracijskog perioda,
- b) Igrač profesionalac čiji je ugovor istekao ili je sporazumno raskinut prije završetka registracijskog perioda može biti registrovan za klub i nakon isteka relevantnog registracijskog perioda,
- c) Igračica može biti registrovana izvan registracijskog perioda kako bi privremeno zamijenila igračicu koja koristi porodijsko odsustvo. Period trajanja ugovora igračice na zamjeni, osim ako je međusobno dogovoreno drugačije, traje od datuma registracije do dana prije početka prvog registracijskog perioda nakon povratka igračice koja je koristila porodijsko odsustvo,
- d) Igračica može biti registrovana izvan registracijskog perioda po završetku porodijskog odsustva, a u skladu sa njenim ugovornim statusom,
- e) Igrač profesionalac čiji je ugovor istekao ili je raskinut posljedicom pandemije COVID-19, ima pravo biti registrovan izvan registracijskog perioda, neovisno o datumu isteka ili raskida ugovora.

(8) Igrači koji se prvi put registruju i igrači koji nisu preregistrovani mogu se registrovati u toku čitave sezone, pod uslovom da je dužna pažnja posvećena sportskom integritetu relevantnog takmičenja i da je takva registracija u skladu sa odredbama Pravilnika o nogometnim/fudbalskim takmičenjima NS/FS BiH.

(9) NS/FS BiH i ostali nadležni savezi su ovlašteni registrovati igrače iz stava (7) ovog

člana, pod uslovom da je dužna pažnja posvećena integritetu takmičenja te da je takva registracija u skladu sa odredbama Pravilnika o nogometnim/fudbalskim takmičenjima NS/FS BiH.

5. Neregistrovani igrači

Član 15.

(1) Ukoliko igrač koji nije registrovan u nadležnom registracionom savezu nastupi za klub na bilo kojoj službenoj utakmici, za takvog igrača će se smatrati da je nastupao nepropisno.

(2) Sankcije za nepropisno nastupanje se mogu izreći igraču, predstavnicima kluba i klubu od strane nadležnih organa NS/FS BiH kao i predstavnicima nadležnih organa entitetskih saveza ili organizatora takmičenja.

6. Registracija i izvještavanje o maloljetnim igračima u akademijama

Član 16.

(1) Klubovi koji upravljaju akademijom (u okviru svoje vlastite strukture i/ili putem drugog subjekta sa pravnim, finansijskim ili stvarnim i nespornim vezama sa klubom), obavezni su prijaviti savezu kojem je pridružen odnosni klub sve maloljetnike koji treniraju u akademiji (koji su registrovani ili nisu registrovani za klub). U slučaju kada se akademijom upravlja izvan teritorije saveza odnosno kluba, klub izvještava savez na čijem teritoriju akademija posluje.

(2) Svaki savez tražit će od svih akademija bez pravnih, finansijskih ili stvarnih i nespornih veza s klubom (privatne akademije), koje posluju na njegovoj teritoriji, da mu prijave sve maloljetnike koji pohađaju tu akademiju. Svaki savez prijavit će nadležnim tijelima bilo kakve nepravilnosti u privatnim akademijama o kojima ima saznanja, te će poduzimati sve potrebne mjere zaštite i sigurnosti maloljetnika od mogućeg zlostavljanja.

(3) Svaki savez treba voditi registar maloljetnih igrača koje su mu prijavili klubovi ili akademije, a koji se sastoji od najmanje sljedećih podataka: puno ime i prezime (ime/na, srednje ime/na i prezime/na), državljanstvo, datum rođenja, država porijekla (ili prijašnja država prebivališta), zastupnik (ako su korištene njegove usluge) i klub koji upravlja odnosnom akademijom.

(4) Klub koji želi saradivati sa privatnom akademijom treba:

- a) prijaviti takvu saradnju savezu čiji je klub član,
- b) osigurati da privatna akademija prijavi svoje igrače savezu na čijem teritoriju akademija posluje,
- c) prije zaključenja ugovora sa privatnom akademijom osigurati da privatna akademija poduzima odgovarajuće mjere zaštite i sigurnosti maloljetnika i
- d) prijaviti nadležnim tijelima bilo kakve nepravilnosti o kojima može imati saznanja, poduzimajući sve potrebne mjere zaštite i sigurnosti maloljetnika od mogućeg zlostavljanja.

(5) Putem postupka prijave akademije igrači se obavezuju igrati nogomet/fudbal u skladu sa Statutom FIFA-e, Statutom i pravilnicima NS/FS BiH te poštivati i promicati etička načela organizovanog nogometa/fudbala.

(6) Odredbe ovog člana primijenjuju se i na maloljetne igrače koji nemaju državljanstvo Bosne i Hercegovine, niti su kontinuirano živjeli u Bosni i Hercegovini najmanje pet godina.

(7) Povreda odredbi ovog člana je kažnjiva, a nadležni disciplinski organ će provesti postupak protiv počinitelja prekršaja.

7. Probe

Član 17.

(1) Klub može pozvati igrača na probu u svoj klub na utvrđeni period.

(2) Igrač profesionalac može biti na probi u drugom klubu samo uz izričitu pisanu dozvolu svog sadašnjeg kluba.

(3) Prije početka probe, klub i pozvani igrač će dogovoriti uslove probe (npr. plaćanje smještaja, putovanja, ishrane i dnevnih troškova), putem FIFA-inog Obrasca o probi igrača. Klub u FIFA TMS mora unijeti potpuno popunjen i potpisan FIFA-in Obrazac o probi igrača najkasnije deset dana prije početka probe. Tokom probe, klub je dužan brinuti o igraču na probi. Naročito, klub treba igraču koji je na probi osigurati te platiti sve neophodne medicinske tretmane u slučaju povreda koje je igrač pretrpio obavljajući aktivnosti u okviru probe.

(4) Najduže trajanje probe za igrače koji imaju 21 godinu i mlađe iznosi osam sedmica, neprekidno ili uz prekide po klubu u bilo kojoj sezoni. Najduže trajanje probe za igrače starije od 21 godine iznosi tri sedmice, neprekidno ili uz prekide po klubu u bilo kojoj sezoni.

(5) Igrač koji je na probi ima pravo nastupiti za klub samo na prijateljskim utakmicama te učestvovati u bilo kojim aktivnostima koje ne spadaju u okvir organizovanog nogometa/fudbala. Takve prijateljske utakmice moraju biti odigrane tokom trajanja relevantne probe.

(6) Svakoj osobi na koju se primjenjuju odredbe FIFA Statuta i statuta NS/FS BiH zabranjeno je tražiti, nuditi i/ili primati bilo kakvo plaćanje u vezi sa probom, ne dovodeći u pitanje sporazum između kluba i igrača na probi o uslovima probe, a u skladu sa stavom (2) ovog člana.

(7) Klubovi koji imaju igrača na probi nemaju pravo na naknadu za treniranje igrača za period tokom kojeg je igrač na probi u tom klubu.

(8) Pored opštih uslova, maloljetni igrač može biti na probi u klubu samo pod sljedećim uslovima:

- a) da datum početka probnog perioda nastupi u sezoni:
 1. šesnaestog rođendana maloljetnog igrača na probi ili
 2. petnaestog rođendana maloljetnog igrača na probi ako se i prebivalište maloljetnika i sjedište kluba nalaze u Evropi,
- b) klub dobije izričitu pisanu dozvolu roditelja maloljetnog igrača na probi,
- c) klub imenuje svog zaposlenika kao kontakt osobu za maloljetnog igrača na probi,
- d) klub maloljetnom igraču na probi osigura optimalni smještaj i životni standard te odgovarajuće pokrivanje troškova,
- e) u slučaju maloljetnih igrača amatera mlađih od šesnaest godina, sadašnji klub maloljetnika mora biti obaviješten o probi te mu mora biti dostavljen u potpunosti ispunjen i potpisan FIFA-in Obrazac o probi igrača.

(9) Maloljetni igrač može učestvovati samo na dvije probe tokom kalendarske godine, od kojih svaka proba najduže može trajati kako je utvrđeno u stavu (4) ovog člana.

8. Registracija igrača koji dolaze iz inostranih klubova

Član 18.

(1) Registracija igrača koji dolaze iz inostranih klubova može se izvršiti nakon dobijanja certifikata o međunarodnom transferu igrača, u skladu sa odredbama ovog Pravilnika i Aneksa 3 i 6 FIFA Pravilnika o statusu i transferu igrača.

(2) U cilju registracije igrača stranih državljana klubovi moraju nadležnom registracionom savezu za predmetnog igrača dostaviti boravišnu dozvolu za teritoriju BiH.

(3) Registracioni savez može izvršiti unos predmeta registracije, odnosno dokumentacije neophodne za registraciju igrača stranog državljanina u COMET informacioni sistem, a nadležni savez za ovjeru i objavu registracija može izvršiti ovjeru takve registracije i uz dostavljanje potvrde da je nadležnom državnom organu podnesen zahtjev za izdavanje boravišne dozvole ali igrač ima pravo nastupa za klub tek po dobijanju navedene dozvole.

(4) Izuzetno, nadležni savez za ovjeru i objavu registracija može izvršiti ovjeru registracije igrača uz valjano podnesen zahtjev za registraciju igrača, ITC, prijavu za registraciju igrača i ugovor potpisan između igrača i kluba, u kojem slučaju igrač ima pravo nastupa za klub ali samo na utakmicama koje se odigravaju u okviru međunarodnih takmičenja.

(5) Obaveza kluba je da ishodi boravišnu dozvolu za igrača.

(6) Igrač nema pravo nastupa na osnovu dokaza/potvrde da je nadležnom državnom organu podnesen zahtjev za izdavanje boravišne dozvole, bez obzira ako ista sadrži podatak o broju dana koliko igrač može boraviti na teritoriji BiH do donošenja rješenja o dozvoli boravka igrača stranca na teritoriji BiH od strane nadležnog organa.

(7) Klub može imati više registrovanih igrača stranih državljana, a tačan broj takvih igrača će biti propisan propozicijama svakog pojedinačnog takmičenja.

9. Preregistracija

Član 19.

(1) Preregistracija je postupak ponovne registracije svih igrača za svoje sadašnje klubove u cilju ažuriranja registara aktivnih igrača u svakom pojedinačnom klubu.

(2) Odluka o preregistraciji igrača objavljuje se u Službenom glasniku NS/FS BiH i službenim glasnicima nadležnih registracionih saveza, najkasnije 15 (petnaest) dana prije početka preregistracije.

(3) Preregistracija se vrši prema potrebi, a u skladu sa odlukom o načinu preregistracije igrača o čemu odluku donosi Izvršni odbor NS/FS BiH ili izvršni odbor nadležnog registracionog saveza za područje tog registracionog saveza, a minimalno svake četiri godine.

10. Registracija bez ispisnice i brisovnice

Član 20.

(1) Registracija igrača koji je u registracionom periodu stekao uslove za promjenu kluba prema odredbama ovog Pravilnika, a nije dobio ispisnicu i brisovnicu, biće izvršena bez ispisnice, odnosno brisovnice, uz podnošenje ostalih dokumenata predviđenih ovim

Pravilnikom, pod uslovom da novi klub umjesto ispisnice dostavi kopiju zahtjeva da je igrač tražio ispisnicu sa dokazom da je zahtjev dostavljen klubu (recipis), a ukoliko mijenja teritoriju saveza, kopiju zahtjeva sa dokazom da je tražio brisovnicu.

(2) Igrači čiji su klubovi odustali od takmičenja, mogu biti registrovani za drugi klub u toku trajanja sezone, osim u periodu od 30 (trideset) dana koji prethode danu kada je rasporedom utvrđeno odigravanje posljednje prvenstvene utakmice.

Član 21.

(1) Za registraciju igrača koji se registruju po osnovu ustupanja ispisnica i brisovnica nisu potrebne.

(2) Za igrače čiji je profesionalni ugovor istekao ili je sporazumno raskinut ili su igrači dobili raskid ugovora na osnovu opravdanih razloga ili sportski opravdanih razloga, nije potrebna ispisnica.

11. Certifikat o međunarodnom transferu (ITC)

Član 22.

(1) Igrač registrovan za klub nekog saveza koji je član FIFA-e, može biti registrovan kao igrač kluba koji je član NS/FS BiH, samo kada NS/FS BiH dobije međunarodni certifikat o transferu (u daljem tekstu: ITC) od prethodnog saveza.

(2) ITC nije potreban za igrače mlađe od 10 (deset) godina.

(3) NS/FS BiH neće zahtijevati izdavanje ITC-a niti će izdavati ITC kako bi se igraču dozvolilo da učestvuje u prijateljskim utakmicama u kontekstu probe.

11.1 Izdavanje ITC-a za igrača profesionalca

Član 23.

(1) Prijavu za registraciju profesionalnog igrača po osnovu ITC-a novi klub mora podnijeti nadležnom registracionom savezu tokom jednog od dva registracijska perioda utvrđena odlukom Izvršnog odbora NS/FS BiH, izuzev ako se radi o igraču iz čl. 21. ovog Pravilnika.

(2) Uz prijavu mora biti priložena kopija ugovora između kluba i igrača.

Član 24.

(1) Profesionalni igrač nema pravo nastupa na zvaničnim utakmicama svog novog kluba, dok prethodni savez ne izda ITC.

(2) Po prijemu zahtjeva kluba, NS/FS BiH će odmah, a najkasnije u roku od 3 (tri) dana zatražiti od prethodnog saveza da izda ITC za profesionalnog igrača.

(3) Kod potraživanja ITC-a za profesionalne igrače, primjenjuje se Aneks 3 FIFA Pravilnika o statusu i transferu igrača (FIFA TMS Sistem).

(4) Rok do kada se može tražiti ITC je zadnji dan registracijskog perioda utvrđenog od strane Izvršnog odbora NS/FS BiH. Izuzetno, ITC se može tražiti i nakon isteka registracijskog perioda za igrače koji su slobodni u registracijskom periodu, odnosno za igrače na koje se

primjenjuje član 21. ovog Pravilnika.

(5) U slučaju da u NS/FS BiH bude dostavljen ITC od drugog saveza, a da NS/FS BiH nije tražio ITC, igrač ne može biti registrovan za klub na teritoriji BiH.

Član 25.

(1) Profesionalnom igraču registrovanom za klub koji je član NS/FS BiH neće se izdati ITC ukoliko se dokaže da njegov ugovor nije istekao, nije sporazumno raskinut ili nije raskinut iz opravdanih ili sportski opravdanih razloga.

(2) Sva pravila u vezi izdavanja ITC-a za profesionalne igrače jednako se odnose i na igrača koji dobija status amatera.

Član 26.

U slučaju da NS/FS BiH od prethodnog saveza ne primi odgovor na zahtjev za izdavanje ITC u roku od 7 (sedam) dana od dana podnesenog zahtjeva, profesionalni igrač će biti registrovan za novi klub.

Član 27.

Prilikom izdavanja ITC-a za igrače profesionalce, NS/FS BiH će uz ITC priložiti i pasoš igrača.

Član 28.

(1) Po prijemu zahtjeva za izdavanje ITC-a NS/FS BiH će, nakon što prethodno zatraži očitovanje kluba u kojem je nastupao igrač za koji je zatražen ITC, u roku od sedam dana izdati ITC ili će obavijestiti nacionalni savez koji traži ITC o razlozima neizdavanja ITC-a.

(2) Ako NS/FS BiH ne izda ITC u roku od sedam dana od dana podnošenja zahtjeva za izdavanje ITC-a, a zaprimi obavijest da je novi savez registrovao igrača nakon proteka prednje navedenog roka, nadležna služba NS/FS BiH će po službenoj dužnosti izdati brisovnicu za tog igrača i evidentirati navedenu promjenu u COMET informacionom sistemu.

11.2 Izdavanje ITC-a za igrača amatera

Član 29.

(1) Aplikaciju za registraciju amatera mora podnijeti novi klub novom savezu u toku jednog od registracijskih perioda koje je utvrdio taj savez.

(2) Po prijemu aplikacije, novi savez je dužan odmah tražiti od prethodnog saveza da izda ITC za igrača („Zahtjev za ITC“).

(3) Prethodni savez je dužan u roku od sedam dana od primitka zahtjeva za ITC izdati ITC novom savezu.

(4) Zahtjev za ITC prethodnom savezu se upućuje isključivo putem FIFA TMS sistema.

(5) Unos podataka u sistem vrši klub ukoliko ima pristup istom, a u suprotnom nadležna služba NS/FS BiH.

(6) U slučaju da NS/FS BiH ne dobije odgovor na zahtjev za izdavanje ITC-a u roku od 7 (sedam) dana od dana podnošenja zahtjeva za ITC, odmah će registrovati amatera za novi klub.

(7) Prednje navedena pravila i procedure važe i za amatere koji nakon prelaska u novi

klub steknu status profesionalnog igrača.

11.3. Izdavanje IFTC-a

Član 30.

(1) Igrač futsala registriran za futsal klub koji je član jednog saveza može biti registriran za futsal klub koji je član drugog saveza samo nakon što:

- a) Novi savez zatraži izdavanje međunarodne dozvole o transferu igrača futsala (IFTC),
- b) Dosadašnji savez izda IFTC,
- c) Novi savez zaprimi IFTC i
- d) Novi savez registruje igrača u svom elektronskom sistemu za registraciju igrača.

(2) Novi futsal klub podnosi zahtjev za registraciju igrača futsala svom savezu tokom jednog od registracijskih perioda koje je utvrdio taj savez, a u skladu sa odredbama Aneksa 6 FIFA Pravilnika o statusu i transferu igrača.

(3) Ako NS/FS BiH ne izda ITC u roku od 30 (trideset) dana od dana podnošenja zahtjeva za izdavanje ITC-a, a zaprimi obavijest da je novi savez registrovao igrača po osnovu privremene registracije nakon protoka prednje navedenog roka, nadležna služba NS/FS BiH će po službenoj dužnosti izdati brisovnicu za tog igrača i evidentirati navedenu promjenu u COMET informacionom sistemu.

(4) U slučaju da NS/FS BiH ne primi odgovor na zahtjev za izdavanje ITC u roku od 30 (trideset) dana od dana podnesenog zahtjeva, igrač futsala će biti registriran za novi klub na privremenoj osnovi (privremena registracija).

(5) Privremena registracija će važiti do godinu dana, računajući od dana podnesenog zahtjeva.

(6) Privremena registracija postaje trajna ukoliko IFTC ili valjani razlozi za neizdavanje IFTC-a nisu dostavljeni tokom jedne godine, računajući od dana podnesenog zahtjeva.

(7) Odredbe iz ovog člana odnose se i na profesionalne igrače i igrače amatere.

12. Ustupanje profesionalnog igrača

Član 31.

(1) Samo profesionalni igrač može biti ustupljen drugom klubu na osnovu pisanog ugovora između igrača i zainteresovanih klubova. Za ustupanje igrača se primjenjuju ista pravila koja se primjenjuju za transfer igrača, uključujući i odredbe o naknadi za treniranje i mehanizmu solidarnosti.

(2) Ustupanje igrača vrši se isključivo u registracijskom periodu, a ovjera registracija igrača po osnovu ustupanja neće se vršiti ukoliko predmet registracije (predviđena dokumentacija) iz člana 36. stava (6) u vezi sa stavom (7), u potpunosti nije unesen u COMET informacioni sistem do isteka registracijskog perioda.

(3) Minimalni period ustupanja igrača je vrijeme između dva registracijska perioda.

(4) Na ustupanje igrača profesionalaca primjenjuju se sljedeća pravila:

- a) Klubovi i igrači zaključuju pisani sporazum kojim se definišu uslovi ustupanja („sporazum o ustupanju“), naročito njegovo trajanje i finansijski uslovi, a kako je detaljno predviđeno stavom (5) ovog člana,
- b) Igrač i novi klub mogu potpisati novi ugovor koji obuhvata period trajanja ustupanja, a kojim se potvrđuje da je igrač na ustupanju u predmetnom klubu,
- c) Tokom dogovorenog trajanja ustupanja, ugovorne obaveze između igrača i dosadašnjeg kluba mogu biti u prekidu/mirovanju, osim ako je pisanim putem drugačije dogovoreno,
- d) Sporazum o ustupanju može se zaključiti sa najkraćim trajanjem u periodu između dva registracijska perioda i najdužim trajanjem od jedne godine. Datum završetka sporazuma o ustupanju treba biti unutar jednog od registracijskih perioda. Bilo koja odredba koja se odnosi na duže trajanje ustupanja neće biti priznata,
- e) Sporazum o ustupanju se može produžiti u skladu sa prednje navedenim odredbama o najkraćem i najdužem trajanju istog uz pisanu saglasnost klubova i igrača,
- f) Novom klubu zabranjeno je izvršiti „podustupanje“ ili izvršiti transfer igrača u treći klub.

(5) Sporazum o ustupanju igrača obavezno sadrži podatke o periodu ustupanja igrača te odredbe o načinu ostvarivanja prava igrača iz radnog odnosa, a posebno odredbe koje se odnose na plaću, naknade, doprinose za penziono i zdravstveno osiguranje i ostala prava koja igraču pripadaju po osnovu važećeg ugovora o radu zaključenim između igrača i kluba koji ga ustupa.

(6) Sporazum o ustupanju potpisuju predstavnici zainteresovanih klubova i igrač, a zaključuje se u četiri primjerka.

(7) Ovlašteno lice nadležnog registracionog saveza, čiji je član klub u koji se igrač ustupa, će nakon pregleda urednosti ugovora sve primjerke istog potpisati na za to predviđeno mjesto u ugovoru te ovjeriti pečatom nadležnog registracionog saveza.

(8) Ustupanje igrača ne smatra se promjenom kluba, osim u smislu primjene odredbi koje se odnose na naknadu za treniranje i mehanizam solidarnosti.

Član 32.

(1) Ustupljeni igrač postaje član kluba kome je ustupljen na određeno vrijeme i njegovo članstvo prestaje istekom roka na koji je ustupljen ili raskidom sporazuma o ustupanju.

(2) Igrač bez ponovne registracije ima pravo nastupa za klub koji ga je ustupio, što ostaje evidentirano u COMET informacionom sistemu.

Član 33.

(1) Sporazum o ustupanju igrača važi do datuma do kojeg je zaključen ukoliko ga klubovi i igrači nisu sporazumno ili na drugi način raskinuli, odnosno produžili.

(2) Klub može po osnovu ustupanja ukupno registrovati najviše šest igrača te ustupiti najviše šest svojih igrača u bilo koje vrijeme u toku jedne sezone, s tim što najviše četiri ustupljena igrača mogu nastupati na jednoj utakmici.

(3) Ograničenje u pogledu broja ustupljenih igrača iz stava (2) ovog člana ne primjenjuje se u sljedeća dva slučaja:

- a) ako se ustupanje realizuje prije završetka sezone dosadašnjeg kluba u kojoj igrač navršava 21 godinu i
- b) ako igrač ima status igrača treniranog u dosadašnjem klubu, u skladu sa tačkom 26. Definicija.

(4) U vezi sa stavom (2) ovog člana te bez obzira na godine ili status igrača treniranog u klubu, primjenjuju se sljedeća ograničenja:

- a) klub može ustupiti najviše tri igrača u isti klub u bilo koje vrijeme tokom sezone i
- b) klub može imati najviše tri igrača ustupljena iz istog kluba u bilo koje vrijeme tokom sezone.

Član 34.

Sporazumi kojim se igrači ustupaju klubovima Premijer/WWIN lige BiH verifikuju se putem COMET informacionog sistema od strane nadležne službe NS/FS BiH i objavljuju se u Službenom glasniku NS/FS BiH, a sporazumi o ustupanju igrača klubovima nižih nivoa takmičenja verifikuju se putem COMET informacionog sistema u entitetskim savezima i objavljuju se u službenim glasnicima entitetskih saveza.

Član 35.

(1) Sporazum o ustupanju igrača može biti raskinut uz saglasnost klubova i igrača u registracijskom periodu.

(2) Sporazumi o raskidu sporazuma o ustupanju igrača objavljuje se u Službenom glasniku NS/FS BiH za igrače koji su bili ustupljeni klubovima Premijer/WWIN lige BiH, a sporazumi o raskidu sporazuma o ustupanju igrača klubovima nižih nivoa takmičenja objavljuju se u službenim glasnicima entitetskih saveza.

(3) Ako je sporazum o ustupanju ili ugovor između igrača i novog kluba (ako je zaključen) jednostrano raskinut krivicom novog kluba prije završetka njegovog ugovorenog trajanja:

- a) igrač se ima pravo vratiti u dosadašnji klub,
- b) igrač mora odmah obavijestiti svoj dosadašnji klub o prijevremenom raskidu te da li se namjerava vratiti u dosadašnji klub,
- c) ako se igrač odluči vratiti u dosadašnji klub, dosadašnji klub mora igrača odmah reintegrirati. Ukoliko je ugovor između igrača i dosadašnjeg kluba bio u prekidu/mirovanju, isti ponovno stupa na snagu od datuma reintegracije te dosadašnji klub mora plaćati sve ugovorene obaveze prema igraču profesionalcu.

(4) U slučaju iz stava (3) ovog člana primjenjuju se odredbe ovog Pravilnika koje se odnose na posljedice jednostranog raskida ugovora, a koje će biti primjenjive i ako dosadašnji klub odmah ne izvrši reintegraciju igrača profesionalca.

(5) Dosadašnji klub ima pravo tražiti naknadu od kluba kojem je igrač ustupljen, a koja je za njega nastala usljed obaveze da izvrši reintegraciju igrača, a minimalna naknada na koju ima pravo je iznos koji će dosadašnji klub morati platiti igraču počev od datuma reintegracije zaključno sa datumom kada bi ugovor o ustupanju u redovnim okolnostima istekao da nije prijevremeno raskinut.

IV POSEBNE ODREDBE VEZANE ZA DOKUMENTACIJU POTREBNU ZA REGISTRACIJU IGRAČA

1. Predmet registracije

Član 36.

(1) U cilju provođenja registracije igrača, klub je dužan da dostavi uredan predmet registracije.

(2) Za igrača koji se registruje prvi put predmet registracije sadrži:

- a) Zahtjev kluba sa popisom dokumenata koji se prilažu za registraciju;
- b) Dva primjerka prijave za registraciju sa fotografijama, uz potpis igrača (u slučaju maloljetnog igrača obavezan je i potpis jednog od roditelja ili staratelja) i predstavnika kluba, ovjerenu pečatom kluba, od kojih je po jedna za klub i registracioni savez;
- c) Fotografija (formata 3,5 x 4,5);
- d) Dokaz o izvršenom ljekarskom pregledu, bez kojeg igrač nema pravo nastupa;
- e) Redni broj iz matične knjige rođenih ili broj lične karte (uz dostavljanje originalnog dokumenta na uvid);
- f) Izjavu igrača (roditelja ili staratelja) da nije bio registrovan odnosno preregistrovan za drugi klub u zemlji ili inostranstvu. Ukoliko se radi o igraču stranom državljaninu ili igraču koji je imao prebivalište na teritoriji druge države, registracioni savez je takvu izjavu dužan provjeriti putem generalnog sekretarijata NS/FS BiH.
- g) Potvrda o izvršenoj uplati takse za registraciju i
- h) Tri primjerka ugovora ili aneksa ugovora ukoliko su zaključeni.

(3) U COMET informacioni sistem se obavezno unose dokumenti i podaci iz tačaka b), c), d) i e) stava (2) ovog člana.

(4) Za igrača koji prelazi iz kluba u klub predmet registracije sadrži:

- a) Zahtjev kluba sa popisom dokumenata koji se prilažu za registraciju;
- b) Dva primjerka prijave za registraciju sa fotografijama, uz potpis igrača i predstavnika kluba, ovjerenu pečatom kluba, od kojih je jedan klubu i registracionom savezu;
- c) Ispisnicu od dosadašnjeg kluba, ili dokaz da je igrač istu tražio od kluba u registracionom periodu;
- d) Brisovnicu, ukoliko igrač mijenja teritoriju saveza nadležnog za registraciju igrača, ili dokaz da je igrač istu tražio od nadležnog organa i da ispunjava uslove za promjenu kluba;
- e) Dokaz o raskidu ugovora;
- f) Dokaz da su ispunjeni uslovi iz ovog Pravilnika, ukoliko se koriste registracioni periodi, u skladu sa ovim Pravilnikom.
- g) Certifikat nadležnog nacionalnog saveza, ukoliko je riječ o igraču koji dolazi iz inostranog kluba;
- h) Tri primjerka ugovora ili aneksa ugovora, ukoliko su zaključeni;
- i) Pasoš igrača za igrače starije od 12 (dvanaest) godina;
- j) Dokaz o uplati taksi za objavu registracije.

(5) U COMET informacioni sistem se obavezno unose dokumenti iz tačaka b), c), h) i i) stava (4) ovog člana.

(6) Za igrača koji se ustupa predmet registracije sadrži:

- a) Zahtjev kluba za registraciju igrača sa popisom dokumenata koji su prilažu za registraciju;
- b) Dva primjerka prijave za registraciju, ovjerenu pečatom kluba, sa nalijepljenim fotografijama igrača, uz potpis igrača i predstavnika kluba;
- c) Četiri primjerka sporazuma o ustupanju potpisan od predstavnika zainteresovanih klubova, igrača i predstavnika saveza za registraciju;
- d) Certifikat za igrače koji se ustupaju od klubova iz inostranstva;
- e) Potvrda o uplaćenju taksu za objavu sporazuma o ustupanju.

(7) U COMET informacioni sistem se obavezno unose dokumenti iz tačaka b), c) i d) stava (6) ovog člana.

2. Obrasci za registraciju

Član 37.

Sadržaj teksta ispisnice, brisovnice i prijedloga obrazaca ugovora usvaja Izvršni odbor NS/FS BiH.

3. Prijava za registraciju

Član 38.

(1) Prijava za registraciju igrača mora biti podnesena zajedno sa primjerkom igračevog ugovora.

(2) Prijava za registraciju sadrži slijedeće podatke: prezime, očevo ime i ime igrača, datum i mjesto rođenja, e-mail adresu, broj telefona, adresu stanovanja, klub kojem pristupa sa naznakom nogomet/fudbal ili futsal, datum potpisa prijave i dosadašnje članstvo.

(3) Igrač je dužan dostaviti tačne podatke iz prijave i to potvrditi potpisom. Predstavnik kluba dužan je u prijavi za registraciju navesti tačne podatke te potpisom i pečatom kluba potvrditi da je igrač svojeručno i određenog dana potpisao prijavu za registraciju, odnosno ovjeriti tačnost podataka.

(4) Za pružanje netačnih podataka igrač i klub, ukoliko se utvrdi da je za njih znao ili je mogao znati, snose odgovornost po odredbama Disciplinskog pravilnika NS/FS BiH, a sa takvom registracijom postupaju se po odredbama ovog Pravilnika.

Član 39.

(1) Igrač ne može odustati od prijave za registraciju, niti potpisati novu prijavu za drugi klub, osim na način predviđen ovim Pravilnikom.

(2) Izuzetno od odredbe iz prethodnog stava, ako klub za koji je igrač potpisao prijavu ne podnese dokumentaciju za registraciju u roku od osam dana od dana potpisa prijave, igrač koji želi da promijeni klub može potpisati prijavu za novi klub, ukoliko ne postoje smetnje predviđene ovim Pravilnikom.

4. Ispisnica

Član 40.

(1) Za prelazak igrača u drugi klub, pored ostalih uslova predviđenih ovim Pravilnikom, potrebna je ispisnica.

(2) Ispisnica važi od dana izdavanja.

(3) Ispisnicu daje klub igraču, a sadrži slijedeće podatke:

- a) Prezime, ime oca i ime igrača,
- b) Datum i mjesto rođenja,
- c) Datum posljednje izvršene registracije i pravo nastupa,
- d) Ime kluba iz kojeg je došao i dosadašnji status,
- e) Eventualna kazna ili suspenzija od strane nogometnog/fudbalskog organa i vrijeme njihovog trajanja,
- f) Datum raskida ugovora,
- g) Broj javnih opomena registriranih u zapisnicima prvenstvenih i kup utakmica u toku sezone u kojoj se izdaje ispisnica i
- h) Primjedbe, ako ih klub eventualno evidentira.

Član 41.

(1) Registrovani igrač koji želi promijeniti klub, može zatražiti ispisnicu koju mu je klub dužan izdati ako su ispunjeni uslovi propisani ovim Pravilnikom.

(2) Klubu se upućuje zahtjev za izdavanje ispisnice pisanim putem i to preporučenom poštanskom pošiljkom ili neposredno, uz potpisanu ovjeru kluba o prijemu takvog zahtjeva.

(3) Registracija igrača za drugi klub ne može se izvršiti bez ispisnice, izuzev u slučajevima koji su posebno predviđeni ovim Pravilnikom.

5. Brisovnica

Član 42.

(1) U slučaju prelaska igrača u klub koji se nalazi na teritoriji drugog registracionog saveza, igrač je dužan da pisanim putem traži potvrdu o brisanju iz evidencije registrovanih igrača.

(2) Nadležni organ za registraciju igrača je dužan da odmah izda potvrdu o brisanju ili obavijest da li postoji neka smetnja za registraciju igrača za novi klub.

(3) Uz zahtjev se prilaže ispisnica ili dokaz da je ispisnica zatražena preporučenom poštanskom pošiljkom ili neposredno (dostavnica ili potpisanu ovjera kluba o prijemu takvog zahtjeva) ili dokaz da je ugovor istekao ili dokaz da je ugovor raskinut.

(4) Brisovnica važi od dana izdavanja.

(5) Kod izdavanja brisovnice, nadležni organ za registraciju igrača je dužan izvršiti provjeru tačnosti i potpunosti podataka navedenih u ispisnici, a ukoliko to nije slučaj, mora od kluba zatražiti da istu tačno i precizno popuni. Također, ukoliko je igrač pod suspenzijom, podaci o istoj moraju biti navedeni i u brisovnici u rubrici „Primjedbe“.

Član 43.

(1) Smatrat će se da je igrač brisan iz evidencije i da ne postoji nikakva smetnja za registraciju za novi klub, iako nema brisovnice, ako je igrač podnio zahtjev za izdavanje potvrde o brisanju u registracijskom periodu i za to ima dokaze, pod uslovom da je uz zahtjev priložio ispisnicu ili zahtjev za ispisnicu, bez obzira što mu organ nadležan za registraciju nije izdao brisovnicu i pod uslovom da su ispunjeni drugi uslovi za registraciju za novi klub.

(2) Registracija igrača je nepravilno izvršena ako je izvršena bez potvrde o brisanju, a nije postupljeno u skladu sa ovim članom, ili postoje druge smetnje za pravilnu registraciju u smislu ovog Pravilnika.

6. Pasoš igrača

Član 44.

(1) Nadležni organ za registraciju igrača je obavezan osigurati pasoš igrača, koji sadrži sve relevantne podatke o igraču i klubovima za koje je igrač bio registrovan. U pasošu igrača će biti naznačeni klubovi za koje je igrač bio registrovan počevši od kalendarske godine u kojoj je navršio 12 (dvanaest) godina.

(2) Pasoš igrača sadrži: ime i prezime igrača, datum i mjesto rođenja, državljanstvo, kategoriju kluba, datum prve i svih narednih registracija, status igrača, dodatni podaci (trajanje ugovora i dr.), broj prijave za registraciju, potpis ovlaštenog lica i pečat registracionog saveza.

(3) Pasoš igrača izdaje registracioni savez sa čijeg područja igrač prelazi u novi klub, i obavezno sadrži informacije o svim klubovima za koje je igrač bio registrovan.

(4) Nadležni registracioni savez odgovara za tačnost i potpunost podataka unesenih u pasoš igrača.

(5) Kopija pasoša ostaje u arhivi nadležnog registracionog saveza.

V OBJAVA REGISTRACIJE

Član 45.

(1) Registracija igrača klubova koji učestvuju u takmičenjima u nadležnosti NS/FS BiH objavljuje se u Službenom glasniku NS/FS BiH.

(2) Registracija igrača klubova nižih nivoa takmičenja objavljuje se u službenom glasniku entitetskog ili drugog nadležnog saveza.

(3) Službeni glasnik svakog saveza se može štampati ili objavljivati na web stranici tog saveza.

Član 46.

(1) Tekst za objavu registracije u Službenom glasniku NS/FS BiH, nadležni registracioni savez može unijeti putem COMET informacionog sistema najkasnije do četvrtka do 23:59 sati, za broj koji izlazi petkom, što se objavljuje u Službenom glasniku na zvaničnoj web stranici NS/FS BiH. Kasnije dostavljene prijave za registraciju igrača bit će objavljene u narednom broju, od kada počinje teći pravo nastupa igrača.

(2) Kod registracije igrača iz inostranstva, registracionom savezu se, uz ostalu dokumentaciju, obavezno dostavlja kopija ITC-a, a isti mora biti zaprimljen i od strane nadležnog

registracionog saveza unesen u COMET informacijski sistem prije objave registracije igrača u Službenom glasniku NS/FS BiH, ili najkasnije do četvrtka do 23:59 sati.

Član 47.

Redovni broj Službenog glasnika NS/FS BiH se objavljuje na zvaničnoj web stranici NS/FS BiH jednom sedmično i to svakog petka, odnosno, u roku koji odredi Izvršni odbor NS/FS BiH, a vanredni broj se objavljuje po potrebi.

Član 48.

(1) U slučaju neblagovremenog izlaska iz štampe Službenog glasnika NS/FS BiH smatrat će se da su ispunjeni uslovi za objavu registracije, ako se utvrdi da je tekst za objavu registracija predat u roku koji omogućava da prijem teksta objave pristigne u generalni sekretarijat do utvrđenog vremena.

(2) Registracija koja ne bude objavljena, a utvrdi se da je tekst za objavu registracija blagovremeno dostavljen, biće objavljen u narednom broju, sa napomenom da važi od dana kada je registracija trebala biti objavljena.

Član 49.

(1) Objava registracija izvršenih u registracijskom periodu vrši se najkasnije sedam dana od posljednjeg dana registracijskog perioda, a spisak preregistrovanih igrača najkasnije 15 (petnaest) dana od posljednjeg dana iz odluke o preregistraciji igrača.

(2) Izuzetno od prethodnog stava, registracija može biti objavljena i poslije navedenog roka, ako se utvrdi da je zahtjev za registraciju sa potrebnom dokumentacijom ili zahtjev za sertifikat podnijet u registracijskom periodu, a registracija do tog datuma nije izvršena ili objavljena bez krivnje kluba, o čemu su klub i registracioni savez dužni dostaviti pisanu izjavu.

(3) Za registraciju igrača iz prethodnog stava važe odredbe za registraciju igrača u registracijskom periodu, sa datumom sjednice na kojoj je registracija izvršena.

VI PRAVO NASTUPA

Član 50.

(1) Igrač stiče pravo nastupa na prijateljskim utakmicama danom registracije, a na zvaničnim prvenstvenim i kup utakmicama danom objave registracije, izuzev igrača koji dolaze iz inostranstva za koje je proces ishođenja boravišne dozvole u toku, a čija registracija može biti ovjerena i objavljena u skladu sa odredbom člana 18. stava (2) ovog Pravilnika, ali takvi igrači pravo nastupa stiču tek po ishođenju navedene dozvole, osim u slučaju iz člana 18. stava (4) ovog Pravilnika.

(2) Predmet registracije igrača, odnosno neophodna dokumentacija, mora biti unesena do četvrtka do 23:59 sati.

(3) Igrač koji je registrovan za klub do kraja registracijskog perioda ima pravo nastupa za taj klub danom objave registracije u službenom glasniku, bez obzira da li je nastupao za drugi klub u bilo kojem rangju takmičenja, u istoj polusezoni.

(4) U svim okolnostima mora se voditi računa o sportskom integritetu takmičenja.

Član 51.

Pravo nastupa danom objave registracije imaju igrači koji su se u ili izvan registracijskog

perioda registrovali u skladu sa članom 14. ovog Pravilnika.

Član 52.

(1) U slučaju da je objavljena registracija osporena prigovorom u pisanom obliku u roku utvrđenom za ulaganje prigovora, pa se pravosnažnom odlukom utvrdi da je prigovor osnovan, registracija se poništava.

(2) U slučaju iz stava 1. ovog člana, klub koji je izvršio nepravilnu registraciju snosi takmičarske i disciplinske posljedice, a igrač, odgovorna lica kluba i registracionog saveza koji su znali da nije bilo uslova za registraciju igrača, biće disciplinski sankcionisana.

Član 53.

U slučaju da se ustanovi da je igrač registrovan suprotno odredbama ovog Pravilnika, a takvo saznanje se stekne poslije roka za ulaganje prigovora za registraciju, registracija ostaje na snazi kao punovažana, a odgovorna lica kluba, igrač i odgovorna lica saveza koji su znali da nije bilo uslova za registraciju igrača, biće disciplinski sankcionisana, dok takmičarski rezultati ostaju nepromijenjeni.

VII PROMJENA KLUBA

1. Pravo na promjenu kluba

Član 54.

(1) Igrači mogu promijeniti klub u ljetnom i zimskom registracijskom periodu na način i u skladu sa postupkom predviđenim ovim Pravilnikom i Pravilnikom FIFA-e.

(2) Naknada za treniranje igrača ili druge finansijske obaveze igrača prema klubu ne mogu biti smetnja igraču za promjenu kluba, a sporna pitanja u vezi sa izvršavanjem tih obaveza rješavaju se u redovnom postupku, na način koji je predviđen ovim Pravilnikom.

(3) Ustupanje igrača ne smatra se promjenom kluba u smislu stava (1) ovog člana, ali se primjenjuju odredbe o naknadi za treniranje i mehanizmu solidarnosti.

2. Odustajanje od promjene kluba

Član 55.

(1) Igrač koji je dobio ispisnicu od kluba, pa uz saglasnost kluba za koji je potpisao prijavu odustane od prijave prije nego što je registracija izvršena, može se u registracijskom periodu vratiti u klub za koji je nastupao do tada i steći pravo nastupa po predhodnoj registraciji.

(2) Za provođenje ove registracije klub dostavlja pisanu izjavu igrača kojom potvrđuje da odustaje od prijave za drugi klub i pisanu potvrdu novog kluba za koji je igrač potpisao prijavu, da je saglasan sa izjavom igrača.

(3) Igrač koji je otišao u inostranstvo, i za kojeg je izdat međunarodni certifikat o transferu (ITC) u korist drugog saveza, a klub u inostranstvu u međuvremenu odustane od njegove registracije, može ponovo biti registrovan za klub u BiH, pod uslovom da je dostavio dokaz da nije registrovan u inostranstvu i da ispunjava uslove iz člana 22. ovog Pravilnika.

(4) Ukoliko je igrač dobio ispisnicu i brisan je iz evidencije registrovanih igrača pa odustane od namjere da se prijavi za drugi klub, može se vratiti u prethodni klub, a imat će pravo nastupa po prethodnoj registraciji pod uslovom da je savez koji je izdao brisovnicu

poništio brisanje igrača u toku registracionog perioda.

VIII ZAŠTITA MALOLJETNIH IGRAČA

Član 56.

(1) Međunarodni transferi igrača dozvoljeni su samo ako igrač ima više od 18 (osamnaest) godina.

(2) Primjenjuje se narednih pet izuzetaka od ovog pravila:

- a) Igračevi roditelji sele u zemlju u kojoj se nalazi sjedište novog klub iz razloga koji nisu vezani za nogomet/fudbal,
- b) Transfer se odvija na teritoriji Evropske Unije (EU) ili Evropskog Ekonomskog Područja (EEA) ili između dva saveza unutar iste zemlje, a igrač ima između 16 (šesnaest) i 18 (osamnaest) godina. U ovom slučaju novi klub mora ispuniti sljedeće minimalne obaveze:
 1. Igraču obezbijediti odgovarajuće nogometno/fudbalsko obrazovanje i/ili trening u skladu s najvišim državnim standardima;
 2. Igraču, pored nogometnog/fudbalskog obrazovanja, garantovati akademsko i/ili školsko i/ili stručno školsko obrazovanje i/ili obuku, koji će igraču omogućiti da ostvari karijeru izvan nogometa/fudbala ako prestane da se bavi profesionalnim nogometom/fudbalom;
 3. Napraviti sve potrebne aranžmane kako bi se osiguralo da se o igraču brine na najbolji mogući način (optimalan životni standard kod porodice domaćina ili u klupskom smještaju, imenovanje mentora u klubu, itd.);
 4. Prilikom registracije takvog igrača relevantnom savezu obezbijediti dokaz da ispunjava gore navedene uslove.
- c) Igrač ne živi dalje od 50 km od državne granice, a sjedište kluba za koji igrač želi da se registruje u susjednom nacionalnom savezu je udaljen 50 km od iste granice. Maksimalna udaljenost između mjesta prebivališta igrača i sjedišta kluba ne smije biti veća od 100 km. U tim slučajevima igrač ne smije promijeniti svoje prebivalište, a dva relevantna nacionalna saveza moraju dati svoju izričitu saglasnost za predmetni transfer,
- d) Igraču je barem privremeno dopušten boravak u zemlji dolaska i/ili su nadležna državna tijela priznala njegov ranjivi položaj i potrebu za državnom zaštitom zemlje dolaska nakon što je pobjegao iz svoje zemlje porijekla (ili prijašnje zemlje prebivališta), iz humanitarnih razloga, bez svojih roditelja te zbog bilo kojeg od sljedećih razloga:
 1. Njegov život ili sloboda ugrožen je na osnovu rase, vjere, nacionalnosti, pripadnosti određenoj društvenoj skupini ili zbog političkog mišljenja ili
 2. Bilo koje druge okolnosti u kojima je njegov život ozbiljno ugrožen.

Ako je maloljetnik formalno priznat kao izbjeglica ili zaštićena osoba, on može biti registrovan za profesionalni klub ili za isključivo amaterski klub. Ne postoje

ograničenja u vezi bilo kojeg naknadnog domaćeg transfera maloljetnika prije nego on navrší 18 (osamnaest) godina. Ako je maloljetnik formalno priznat kao tražitelj azila ili su nadležna državna tijela priznala njegov ranjivi položaj, on može biti registrovan isključivo i samo za amaterski klub, s tim da može biti naknadno transferisan u domaćem transferu, ali mu nije dozvoljena registracija za profesionalni klub dok ne navrší 18 (osamnaest) godina,

- e) Igrač je student i bez svojih roditelja privremeno se seli u drugu državu zbog akademskih razloga da bi učestvovao u programu razmjene. Trajanje igračeve registracije za novi klub dok on navrší 18 godina, ili do kraja akademskog ili školskog programa, ne može trajati duže od jedne godine. Igračev novi klub može biti isključivo amaterski klub, bez profesionalne ekipe, ili bez pravne, finansijske ili de facto veze s profesionalnim klubom.

(3) Uslovi iz ovog člana primjenjuju se i na svakog igrača koji nije nikad ranije bio registrovan za neki klub i koji nije državljanin zemlje u kojoj želi da se registruje po prvi put te koji ne živi u pomenutoj zemlji u kontinuiranom razdoblju od najmanje pet posljednjih godina.

(4) Svaki međunarodni transfer iz stava (2) ovog člana i svaka prva registracija iz stava (3) ovog člana, kao i svaka prva registracija stranog maloljetnog igrača koji u zemlji u kojoj se želi registrovati živi najmanje pet posljednjih godina u kontinuitetu, podliježu odobrenju potkomisije imenovane u tu svrhu od Komisije za status igrača, ako predmetni maloljetnik ima najmanje 10 (deset) godina.

(5) Zahtjev za odobrenje podnosi savez koji želi registrovati igrača na zahtjev svog pridruženog kluba. Bivšem savezu daje se mogućnost da dostavi svoje očitovanje. Odobrenje potkomisije treba biti dobiveno prije podnošenja svakog zahtjeva od strane saveza za izdavanje ITCa i/ili prvu registraciju.

(6) Ako je maloljetnik mlađi od 10 (deset) godina, odgovornost je saveza koji namjerava registrovati takvog igrača na zahtjev svog pridruženog kluba, da utvrdi i osigura da igračeve okolnosti, bez ikakve sumnje, spadaju pod jednu od izuzetaka navedenih u stavu (2) ovog člana ili da se radi o pravilu o pet godina u skladu sa stavovima (3) i (4) ovog člana. Takva verifikacija treba biti obavljena prije bilo kakve registracije.

(7) U posebnim okolnostima savez može potkomisiji podnijeti pisani zahtjev putem Sistema za usklađivanje transfera (TMS) te zatražiti odluku kojom se odobrava ograničeno izuzeće za maloljetnike („LME“).

(8) Procedure apliciranja potkomitetu za prvu registraciju i Certifikat o međunarodnom transferu maloljetnog igrača propisane su FIFA Pravilnikom o statusu i transferu igrača.

IX STATUS IGRAČA

Član 57.

(1) Igrači koji učestvuju u organizovanom nogometu/fudbalu su ili ameteri ili profesionalci.

(2) Klubovi su dužni sve registrovane igrače osigurati od povreda, trajnog invaliditeta i smrti, ako su isti nastali prilikom treniranja, takmičenja, putovanja na takmičenje i putovanja na treninge.

1. Igrači amateri

Član 58.

(1) Igrač amater je igrač koji za svoju nogometnu/fudbalsku djelatnost nije plaćen više nego što iznose troškovi koje je on stvarno imao, a koji su definisani članom 59. stavom (2) ovog Pravilnika.

(2) Klubovi Prvih i Drugih liga moraju imati zaključene amaterske ugovore sa igračima, a izuzetno, u slučaju saglasnosti volja objiju strana, klubovi mogu sa igračima zaključiti profesionalne ugovore.

Član 59.

(1) Ako su primanja igrača amatera veća od troškova koje nastanu za klub u zamjenu za igračevu nogometnu/fudbalsku aktivnost, takav igrač se smatra profesionalnim igračem bez obzira na vrstu ugovora, a što će nadležni organ cijiniti u svakom konkretnom slučaju.

(2) Troškovi koje je klub dužan izmiriti igraču amateru su:

- a) troškovi puta i smještaja, kada klub odlazi na takmičenje i pripreme,
- b) troškovi pojačane ishrane,
- c) troškovi radne/sportske opreme,
- d) troškovi putovanja.

(3) Ukoliko klub i igrač ugovore stipendiranje igrača, troškovi mjesečne stipendije za školovanje igrača mogu se odrediti u maksimalnom neoporezivom iznosu u skladu sa entitetskim pozitivnim propisima. U suprotnom, ugovor o stipendiranju će se smatrati profesionalnim ugovorom.

Član 60.

(1) Za igrače amatere koji zaključe ugovor sa klubom primjenjuju se odredbe ovog Pravilnika koje se odnose na ostale igrače amatere, kada su u pitanju registracijski periodi i druge odredbe koje se odnose na amatere.

(2) Izuzetno, igrač amater koji je zaključio ugovor s klubom ne može biti registrovan za novi klub dok mu traje ugovorna obaveza.

(3) Igrač amater može biti registrovan samo u utvrđenom registracijskom periodu, izuzev igrača koji se prvi put registruje ili igrača koji se preregistruje.

(4) Igrač koji je navršio najmanje 14 (četnaest) godina, može zaključiti amaterski ugovor u trajanju do najviše 12 (dvanaest) mjeseci ukoliko je ugovor između kluba i igrača amatera zaključen do 30.06. tekuće godine, a ukoliko je ugovor između kluba i igrača amatera zaključen nakon prednje navedenog datuma, takav ugovor može trajati naduže do kraja date sezone.

(5) Amaterski ugovor se može zaključiti i tokom sezone i u tom slučaju traje do kraja tekuće sezone.

Član 61.

(1) Amaterski ugovori zaključuju se i raskidaju prema proceduri propisanoj za profesionalne ugovore, u skladu sa odredbama ovog Pravilnika.

(2) Sporazumni raskidi amaterskih ugovora mogu se vršiti tokom cijelog trajanja sezone, dok je raskid amaterskih ugovora po svim drugim osnovama dozvoljen samo u registracijskim periodima.

(3) Članstvo u klubu i amaterski ugovor ne može se jednostrano raskinuti u toku takmičenja.

Član 62.

U cilju zaštite integriteta takmičenja, u slučajevima raskida ugovora i pristupa novom klubu, na igrače amatere primjenjivat će se iste odredbe koje važe i za profesionalne igrače.

2. Profesionalni igrači

Član 63.

(1) Profesionalni igrač je igrač koji ima ugovor o radu sa klubom, zaključen u pisanoj formi i koji je za svoju nogometnu/fudbalsku djelatnost plaćen više nego što iznose troškovi koji za njega stvarno nastaju. Svi ostali igrači se smatraju amaterima.

(2) Klubovi Premijer/WWIN lige BiH moraju zaključiti ugovore o radu igrača profesionalaca sa najmanje 11 (jedanaest) svojih igrača.

(3) Za igrače profesionalce klub je dužan da uplaćuje doprinose, koji se plaćaju na plate iz radnog odnosa, posebno doprinose za penziona - invalidsko osiguranje, a ovo pitanje predstavlja sastavni dio ugovora o radu profesionalnog igrača.

3. Zaključivanje ugovora sa profesionalnim igračima

Član 64.

Sa igračem koji je odabrao igranje nogometa/fudbala kao svoju profesiju obavezno se zaključuju ugovori o radu koji sadrže obavezne elemente propisane državnim, odnosno entitetskim propisima, te propisima NS/FS BiH i FIFA Pravilnika o statusu i transferu igrača.

Član 65.

(1) Minimalna dužina trajanja ugovora je period od datuma njegovog stupanja na snagu do kraja sezone, dok je maksimalna dužina trajanja ugovora pet godina.

(2) Igrači mlađi od 18 (osamnaest) godina ne smiju potpisivati profesionalne ugovore koji traju duže od tri godine. Bilo koja klauzula koja se odnosi na duže trajanje ugovora je ništava.

(3) Klub koji namjerava zaključiti ugovor sa profesionalnim igračem o tome mora obavijestiti igračev aktuelni klub pisanim putem prije stupanja u pregovore sa profesionalnim igračem.

(4) Profesionalni igrač može zaključiti ugovor sa drugim klubom samo ako je njegov ugovor sa trenutnim klubom istekao ili ako njegov ugovor sa trenutnim klubom ističe u roku od narednih šest mjeseci. Svako kršenje ove odredbe biće kažnjeno odgovarajućim sankcijama predviđenim Disciplinskim pravilnikom NS/FS BiH.

(5) Ako igrač zaključi ugovor sa drugim klubom šest mjeseci prije isteka važećeg ugovora sa prethodnim klubom, takav ugovor se može ovjeriti i verifikovati samo nakon isteka ili raskida važećeg ugovora po bilo kojem osnovu, ili nakon dobijanja ITC-a za igrače koji dolaze iz inostranstva.

(6) Ako igrač namjerava potpisati novi ugovor u roku šest meseci prije isteka njegovog postojećeg ugovora, može u tom periodu potpisati samo jedan novi ugovor.

(7) Valjanost ugovora ne može biti uslovljena pozitivnim ljekarskim pregledom i/ili dobijanjem radne dozvole.

Član 66.

(1) Ugovor potpisuju igrač i predstavnik kluba.

(2) Sve vrste ugovora, izmjena i dopuna ugovora, sporazuma i sl. se potpisuju u sjedištu nadležnog registracionog saveza uz prisustvo svih zainteresovanih lica u skladu sa ovim Pravilnikom.

(3) Ugovor igrača koji nije navršio 18 (osamnaest) godina na dan potpisivanja ugovora, pored igrača, potpisuje roditelj ili staratelj, odnosno, zakonski zastupnik igrača.

(4) Ugovor se zaključuje se u tri istovjetna primjerka, od kojih jedan primjerak za igrača te po jedan primjerak za klub i nadležni registracioni savez.

(5) Ovlašteno lice nadležnog registracionog saveza će nakon pregleda urednosti ugovora, sve primjerke istog potpisati na za to predviđeno mjesto i ovjeriti pečatom nadležnog registracionog saveza.

(6) U slučaju bio kakvih naknadnih ugovaranja između igrača i kluba, obaveza kluba je da iste dostavi nadležnom registracionom savezu u roku od (15) petnaest dana od dana njihovog potpisivanja.

(7) Nadležni organi će prilikom rješavanja sporova uzimati u obzir sva naknadna ugovaranja između kluba i igrača, a za koje se može dokazati da proizlaze iz ugovora potpisanog između kluba i igrača i onda kada kada isti nisu uredno dostavljeni nadležnom registracionom savezu na ovjeru, uz obavezu pokretanja disciplinskog postupka pred nadležnim disciplinskim organom protiv kluba zbog nepoštivanja obaveze iz stava (6) ovog člana.

Član 67.

(1) Potpis stavljen na ugovor ne može se jednostrano povući.

(2) Ugovor stupa na snagu danom kako su to ugovorne strane utvrdile, a ako isti nedostaje, ugovor stupa na snagu danom ovjere u nadležnom registracijskom savezu.

(3) Prednje navedeno važi i kod ostvarivanja prava po osnovu ugovora kod nadležnog organa registracionog saveza.

Član 68.

Ugovorom između igrača i kluba utvrđuju se međusobni odnosi, obaveze kluba prema igraču, obaveze igrača prema klubu i druge odredbe koje su dogovorene između kluba i igrača.

Član 69.

Datum zaključenja ugovora i vrijeme trajanja istog evidentira se u COMET informacionom sistemu.

Član 70.

Ukoliko ugovor igrača ističe na kraju sezone ili polusezone, a najkasnije do 31.12. ili 30.06. date sezone, smatra se da je ugovor istekao prvog narednog dana od dana posljednje odigrane utakmice stalnog takmičenja (sezone ili polusezone).

Član 71.

Ugovor koji je zaključen uz korištenje usluga nogometnog/fudbalskog zastupnika mora

sadržavati podatke o imenu i prezimenu nogometnog/fudbalskog zastupnika, podatke o njegovom klijentu, broj njegove FIFA-ine licence i njegov potpis, a u skladu sa FIFA-inim Pravilnikom o nogometnim/fudbalskim zastupnicima te Pravilnikom o nogometnim/fudbalskim zastupnicima NS/FS BiH.

Član 72.

Odredbe u ugovoru koje su suprotne odredbama ovog Pravilnika i FIFA Pravilnika o statusu i transferu igrača smatraju se ništavim.

4. Verifikacija ugovora

Član 73.

(1) Verifikaciju ugovora, sporazuma o ustupanju igrača te svih vrsta raskida i produženja ugovora igrača i klubova Premijer/WWIN lige BiH vrši NS/FS BiH, a ostale verifikuju nadležni entitetski savezi.

(2) Po unosu ugovora u COMET informacioni sistem od strane nadležnog registracionog saveza, nadležna služba NS/FS BiH ili entitetskih saveza provjerava usklađenost ugovora sa pravnim aktima NS/FS BiH i relevantnim državnim, odnosno entitetskim propisima te isti verifikuje elektronskim putem u COMET informacionom sistemu.

(3) Verifikacija ugovora vrši se u cilju provođenja kontrole nad primjenom ovog Pravilnika od strane igrača, klubova i registracionih saveza te zaštite ugovornih strana i ne predstavlja uslov za nastup igrača.

(4) Ukoliko postoje smetnje za verifikaciju, nadležna služba NS/FS BiH ili entitetskog saveza o tome obavještava nadležni registracioni savez i klub.

(5) Klub je dužan da otkloni nedostatke na koje mu je ukazala nadležna služba NS/FS BiH ili entitetskog saveza u roku koji ne može biti duži od 30 (trideset) dana, pod prijetnjom sankcije koja je predviđena Disciplinskim pravilnikom NS/FS BiH.

5. Prestanak aktivnosti

Član 74.

(1) Profesionalni igrači koji po isteku svojih ugovora završavaju karijeru, te amateri koji prestaju da se bave nogometnom/fudbalskom aktivnosti, ostaće registrovani za svoj posljednji klub kod NS/FS BiH na period od 30 (trideset) mjeseci pod uslovom da je njihov zadnji klub registrovan u NS/FS BiH.

(2) Ovaj period počinje teći od dana kada je igrač imao svoj zadnji nastup za klub na službenoj utakmici.

6. Vraćanje amaterskog statusa

Član 75.

(1) Igrač koji je registrovan kao profesionalac ne može se ponovo registrovati kao amater dok ne prođe najmanje 30 (trideset) dana od njegove posljednje utakmice koju je odigrao kao profesionalac.

(2) Po ponovnom sticanju amaterskog statusa naknada za treniranje se ne plaća.

(3) Ukoliko se igrač ponovo registruje kao profesionalac u roku od 30 (trideset) mjeseci od vraćanja amaterskog statusa, njegov novi klub dužan je platiti naknadu za treniranje.

X ODRŽAVANJE UGOVORNE STABILNOSTI IZMEĐU PROFESIONALNIH IGRAČA I KLUBOVA

1. Poštivanje ugovora

Član 76.

(1) Izvršni odbor NS/FS BiH utvrđuje, u obliku obrazaca ugovora, minimum uslova koje ugovori moraju sadržavati.

(2) Klub i igrač mogu ugovoriti dodatne uslove u ugovorima ali ne mogu ugovarati odredbe koje bi bile nepovoljnije za igrača ili klub u odnosu na odredbe iz obrasca ugovora te će sve eventualne takve odredbe biti ništave.

(3) Ako profesionalni igrač zaključi više od jednog ugovora, čije važenje obuhvata isti vremenski period, a niti jedan još uvijek nije ovjeren, važi ugovor koji je prvi zaključen.

(4) Klupski pravilnici na koje se pozivaju odredbe ugovora moraju biti u saglasnosti s propisima NS/FS BiH.

Član 77.

(1) Ugovor između profesionalnog igrača i kluba prestaje po isteku vremena na koji je ugovor zaključen ili uz obostranu saglasnost.

(2) Ugovor može raskinuti bilo koja strana bez posljedica bilo koje vrste (bilo plaćanja obeštećenja ili izricanja sportskih sankcija) iz opravdanih razloga, ili opravdanih sportskih razloga.

(3) Ugovor ne može biti jednostrano raskinut bez opravdanog razloga u toku sezone, a što će nadležni organi cijeliti u svakom konkretnom slučaju.

Član 78.

(1) Profesionalni igrač koji zbog povrede ne igra, ne može se jednostrano raskinuti ugovor sve dok traje medicinska rehabilitacija. Takav igrač ostaje član kluba, a sve do isteka ugovora ima pravo na platu kao i na sva druga prava po osnovu ugovornog odnosa.

(2) Profesionalni igrač koji odbija rehabilitaciju ili redovne treninge, nema prava iz prethodnog člana.

(3) Teret dokazivanja da igrač odbija rehabilitaciju ili redovne treninge je na klubu.

Član 79.

Profesionalni igrač koji je mlađi od 18 (osamnaest) godina, može raskinuti ugovor prije isteka roka ako se registruje za inostrani klub, a mijenja mjesto boravka zbog preseljenja porodice.

2. Sporazumni raskid ugovora

Član 80.

(1) Sporazumni raskid ugovora može se vršiti tokom sezone, a registracija igrača po ovom osnovu vrši se u registracijskim periodima.

(2) Kod sporazumnog raskida profesionalnog ugovora, ugovorne strane u pisanoj formi utvrđuju međusobna prava i obaveze koja su proistekla iz prekinutog ugovora.

3. Raskid ugovora iz opravdanih razloga

Član 81.

(1) Kada postoji opravdani razlog, svaka strana može raskinuti ugovor bez posljedica bilo koje vrste (plaćanje naknade ili izricanje sportskih sankcija).

(2) Opravdani razlozi za raskid ugovora od strane kluba mogu biti: odbijanje treniranja, odbijanje rehabilitacije, neodazivanje pozivu za odigravanje utakmica, kao i druge povrede radnih obaveza koje se učestalo i nakon opomena u pisanom obliku ponavljaju.

(3) Opravdani razlozi za raskid ugovora od strane igrača mogu biti: neisplaćivanje plate, neisplaćivanje drugih naknada, neplaćanje doprinosa za penziono – invalidsko osiguranje, kao i povrede drugih ugovorom preuzetih obaveza koje se i nakon opomena u pisanom obliku ponavljaju.

(4) U slučaju da klub nezakonito propusti isplatiti igraču najmanje dvije mjesečne plate i/ili doprinose za penziono-invalidsko osiguranje igrača sa profesionalnim ugovorom na datume njihovog dospjeća za period više od dva mjeseca ili ne osigura igrača za slučajevne povreda nakon dva mjeseca od dana zaključenja ugovora, smatrat će se da igrač ima opravdan razlog za raskid ugovora, pod uslovom da je dužnika (klub) pisanim putem upozorio o neplaćanju i dao mu rok od najmanje 15 (petnaest) dana u kojem klub dužnik treba u potpunosti ispuniti svoje obaveze.

(5) Za sva primanja igrača čija isplata ne dospijeva po mjesečnoj osnovi, u obzir se uzima proporcionalna vrijednost za dva mjeseca. Zakašnjela uplata iznosa koji je jednak iznosu za najmanje dva mjeseca također se smatra opravdanim razlogom da igrač raskine svoj ugovor, pod uslovom da on postupi na način kako je navedeno u prethodnom stavu ovog člana.

(6) Svako protupravno ponašanje jedne ugovorne strane s ciljem prisiljavanja druge ugovorne strane na raskid ugovora ili izmjene odredaba ugovora, daju toj drugoj ugovornoj strani (igraču ili klubu) pravo na raskid ugovora zbog opravdanog razloga.

(7) Opravdanost razloga za raskid ugovora cijelit će se od slučaja do slučaja, na zahtjev igrača, odnosno kluba.

Član 82.

Ukoliko igrač i klub ne mogu postići dogovor, raskid ugovora iz opravdanih razloga odobravaju komisije za status igrača nadležnog registracionog saveza u prvom stepenu, odnosno u drugom stepenu, po žalbi, Komitet za status i transfer igrača NS/FS BiH za igrače klubova Premijer/WWIN lige BiH, dok komisije za status igrača entitetskih saveza odobravaju raskid ugovora iz opravdanih razloga za igrače nižih nivoa takmičenja.

Član 83.

(1) Raskid ugovora iz opravdanih razloga, na zahtjev igrača ili kluba, ne isključuje pravo

kluba da traži naknadu za treniranje, u skladu sa ovim Pravilnikom, ili odlukom Izvršnog odbora i povrat iznosa koje je igrač primio kod potpisa ugovora srazmjerno vremenu koji je preostao do isteka ugovora. Ovo se ne odnosi na plate i premije koje je igrač primao.

(2) Igrač kome je raskinut ugovor iz opravdanih razloga, može za drugi klub biti registrovan samo u registracijskom periodu.

4. Posljedice raskida ugovora bez opravdanog razloga

Član 84.

(1) Strana koja raskine ugovor bez opravdanog razloga dužna je platiti naknadu drugoj strani.

(2) Naknada za raskid ugovora obračunavaće se uzimajući u obzir nacionalne propise, odnosno propise entiteta, specifičnost sporta, te sve druge objektivne kriterije.

(3) Kriteriji iz prethodnog stava, kada klub jednostrano raskidne ugovor, posebno uključuju platu i druge beneficije koje se duguju igraču prema postojećem ugovoru i/ili novom ugovoru, sporazumu i sl., preostalo vrijeme trajanja ugovora a najviše do pet godina, honorare i troškove koje je platio ili imao prethodni klub (amortizovane tokom trajanja ugovora) kao i da li to kršenje ugovora pada u zaštićenom periodu, kao i ostala pravila navedena u FIFA-inom Pravilniku o statusu i transferu igrača te se iznos naknade koja pripada igraču u tom slučaju računa kako slijedi:

- a) U slučaju da igrač nije potpisao novi ugovor nakon raskida svog prijašnjeg ugovora, kao opće pravilo, naknada će biti jednaka preostaloj vrijednosti ugovora koji je raskinut,
- b) U slučaju da je igrač potpisao novi ugovor do trenutka donošenja odluke nadležnog organa, vrijednost novog ugovora za period koji odgovara vremenu koje je preostalo prema raskinutom ugovoru oduzima se od preostale vrijednosti ugovora koji je raskinut („Umanjena naknada“),
- c) U slučaju raskida ugovora zbog dospelih obaveza, pored „umanjene naknade“, igrač ima pravo na iznos koji odgovara trima mjesečnim plaćama („Dodatna naknada“). U slučaju vanrednih okolnosti, dodatna naknada može biti povećana do iznosa od najviše šest mjesečnih plaća s tim da sveukupna naknada nikada ne smije prelaziti preostalu vrijednost ugovora koji je raskinut.

(4) Pravo na naknadu ne može se prenositi na treću stranu.

(5) Ako se od profesionalnog igrača traži da plati naknadu, taj profesionalni igrač i njegov novi klub će biti solidarno i pojedinačno odgovorni za njeno plaćanje. Iznos se može definisati ugovorom ili sporazumom između strana.

(6) Pored obaveze plaćanja naknade, biće izrečene i sportske sankcije igraču za kojeg se utvrdi da je raskinuo ugovor tokom zaštićenog perioda i to zabrana nastupa na službenim utakmicama u trajanju od četiri mjeseca. U slučaju otežavajućih okolnosti, zabrana traje šest mjeseci. Sportske sankcije stupaju na snagu odmah nakon što igrač primi obavijest o relevantnoj odluci. Primjena sportskih sankcija prekida se u periodu između posljednje službene utakmice sezone i prve službene utakmice sljedeće sezone te u oba slučaja uključuje nacionalne kupove i međunarodna prvenstva za klubove. Međutim, ovaj prekid primjene sportskih sankcija ne primjenjuje se u slučaju da je igrač standardni član reprezentativne selekcije saveza koju ima pravo predstavljati te odnosni savez učestvuje u završnom takmičenju međunarodnog turnira u periodu između posljednje utakmice i prve utakmice nove sezone.

(7) Pored obaveze plaćanja naknade, sportske sankcije izriču se i svakom klubu za kojeg se utvrdi da je raskinuo ugovor ili se utvrdi da je poticao na raskid ugovora tokom zaštićenog perioda. Osim ako se utvrdi drugačije, pretpostavlja se da je svaki klub koji potpisuje ugovor sa igračem profesionalcem koji je svoj ugovor raskinuo bez opravdanog razloga, potaknuo tog igrača profesionalca na raskid ugovora. Tom klubu će u trajanju od dva cjelokupna i uzastopna registracijska perioda biti zabranjeno registrovati sve nove igrače, neovisno da li se radi o domaćem ili međunarodnom transferu. Klub će moći registrovati nove igrače, bilo iz zemlje ili inostranstva tek od sljedećeg registracijskog perioda, a koji će uslijediti nakon što izrečena sportska sankcija bude u potpunosti izdržana. U ovom slučaju, klub ne može koristiti izuzetke predviđene članom 14. stavovima (6) i (7) ovog Pravilnika kako bi ranije registrovao igrače.

(8) Disciplinske sankcije mogu biti izrečene i izvan zaštićenog perioda zbog nepravovremenog obavještanja o raskidu ugovora u roku od 15 (petnaest) dana od zadnje utakmice u sezoni (uključujući državne kupove) kluba za koji je igrač registrovan.

(9) Zaštićeni period ponovo počinje teći kada prilikom obnavljanja ugovora bude produženo trajanje prethodnog ugovora.

(10) Svaka osoba koja je dužna poštovati Statut i propise NS/FS BiH (službena lica kluba, nogometni/fudbalski zastupnici, igrači, itd.), a koja se ponaša na način kojim navodi na raskid ugovora između igrača profesionalca i kluba u cilju olakšavanja transfera igrača, biti će sankcionisana.

Član 85.

(1) Klub koji je isplatio igraču odštetu za jednostrani raskid ugovora ima pravo na naknadu za treniranje igrača, ukoliko igrač potpiše profesionalni ugovor sa drugim klubom.

(2) Jednostrani raskid ugovora bez opravdanog razloga nakon zaštićenog perioda neće dovesti do sportskih sankcija, osim u slučaju iz člana 94. stava (1), a u vezi sa članom 95. ovog Pravilnika.

Član 86.

U slučaju da igrač jednostrano raskine ugovor obavezan je klubu vratiti, odnosno isplatiti iznos naknade koji je primio prilikom zaključenja ugovora. Takav igrač ne može promijeniti klub dok mu ne istekne predmetni ugovor.

Član 87.

Kod jednostranog raskida ugovora od strane igrača, klub ima pravo na odštetu ali i naknadu za treniranje igrača u skladu sa ovim Pravilnikom ili u skladu sa odlukom Izvršnog odbora NS/FS BiH odnosno u skladu sa ugovorom zaključenim između igrača i kluba, ako je ovo pitanje regulisano ugovorom.

Član 88.

Klubovi mogu sa profesionalnim igračima u ugovoru utvrditi naknade odnosno odštete za raskide ugovora po raznim osnovima.

5. Raskid ugovora iz sportski opravdanih razloga

Član 89.

(1) Igrač profesionalac koji je tokom sezone nastupao na manje od 10% službenih

utakmica koji je odigrao njegov klub, može prijevremeno raskinuti ugovor na osnovu sportski opravdanog razloga. Prilikom ocjenjivanja takvog slučaja, treba pažljivo razmotriti igračevu situaciju.

(2) Postojanje sportski opravdanog razloga se utvrđuje od slučaja do slučaja. U takvom slučaju ne izriču se sportske sankcije, iako se može izreći plaćanje odštete, a klub ima pravo tražiti da mu igrač vrati ugovorene iznose koje je primio srazmjerno vremenu koje je raskinuo ugovor prije isteka.

(3) Profesionalni igrač može raskinuti svoj ugovor iz sportski opravdanih razloga samo u roku od 15 (petnaest) dana nakon posljednje službene utakmice u sezoni u kojoj su nastupili uslovi za raskid ugovora po ovom osnovu.

Član 90.

(1) Raskid ugovora iz sportski opravdanih razloga odobravaju komisije za status igrača nadležnih registracionih saveza u prvom stepenu, odnosno po žalbi, u drugom stepenu, Komitet za status igrača NS/FS BiH za igrače klubova Premijer/WWIN lige BiH, a komisije za status igrača entitetskih saveza za igrače nižih nivoa takmičenja.

(2) Raskid ugovora po ovom osnovu ne isključuje pravo kluba na naknadu za treniranje, u skladu sa odredbama ovog Pravilnika.

(3) Igrač kome je raskinut ugovor iz sportski opravdanih razloga, može za drugi klub biti registrovan samo u registracijskom periodu.

7. Zaštićeno razdoblje

Član 91.

(1) Ne može se raskinuti ugovor igraču koji je proveo u klubu tri cjelokupne sezone ili tri godine, u zavisnosti šta prvo nastupi, nakon zaključenja ugovora između kluba i igrača, ako je ugovor zaključen prije 28. rođendana igrača profesionalca, odnosno razdoblje od dvije cjelokupne sezone ili dvije godine, u zavisnosti šta prvo nastupi, nakon zaključenja ugovora između kluba i igrača, ako je takav ugovor zaključen nakon 28. rođendana profesionalca. Prethodno pomenuti periodi smatraju se zaštićenim razdobljem.

(2) Izuzetno, ugovor u smislu ovog člana može se raskinuti ako igrač odbija da izvršava ugovorne obaveze, odnosno odbija da trenira ili igra bez opravdanog razloga, što je klub dužan dokazati.

8. Dospjele novčane obaveze kluba

Član 92.

(1) Klubovi moraju ispunjavati svoje novčane obaveze prema igračima i drugim klubovima u skladu sa uslovima utvrđenim u ugovorima, aneksima ili sporazumima potpisanim s igračima i klubovima, kao i novčane obaveze nastale na osnovu ugovora o transferima.

(2) Da bi se smatralo da klub ima dospjelih obaveza u smislu ovog člana, povjerilac (igrač ili klub) mora pisanim putem upozoriti dužnika (klub) o neplaćanju i dati mu rok od najmanje 10 (deset) dana u kojem klub treba ispuniti svoje novčane obaveze.

(3) Klub za kojeg se utvrdi da je zakasnio s plaćanjem dospjele obaveze više od 30 (trideset) dana bez *prima facie* ugovorne osnove, može biti kažnjen u skladu sa Disciplinskim

pravilnikom NS/FS BiH.

(4) Odredbe vezane za raskid ugovora zbog neisplate dospjelih novčanih obaveza se ne odnose na ovaj član i predstavljaju posebnu tačku 3. poglavlja X (Raskid ugovora iz opravdanih razloga).

(5) Odredbe o vrsti kazni za klub koji kasni s ispunjavanjem obaveza iz stava 1. ovog člana utvrđene su Disciplinskim pravilnikom NS/FS BiH.

9. Posebne odredbe vezane za ugovore i status igračica

Član 93.

(1) Tokom trajanja ugovora, igračica ima pravo na porodiljsko odsustvo koji se plaća u visini dvije trećine njene plate ili naknade.

(2) Ako je zakonom, kolektivnim ugovorom ili ugovorom između igračice i kluba određeno povoljnije pravo za igračicu, primjenjuju se odredbe tog pravnog akta.

Član 94.

(1) Valjanost ugovora ne može biti uslovljena činjenicom da je igračica trudna ili da će zatrudniti, da koristi porodiljsko odsustvo ili druga materinska prava tokom trajanja ugovora.

(2) Porodiljsko odsustvo u smislu ovog Pravilnika je period od najmanje četrnaest sedmica plaćenog odsustva koji se omogućava igračici zbog trudnoće, od čega se najmanje osam sedmica koristi nakon poroda, ukoliko relevantnim zakonskim propisom nije predviđeno drugačije.

(3) Ako klub jednostrano raskine ugovor jer je igračica trudna ili će zatrudnjeti, jer koristi porodiljsko odsustvo ili druga materinska prava, smatrat će se da je klub raskinuo ugovor bez opravdanog razloga.

(4) Pretpostavlja se, osim ako se dokaže suprotno, da je do jednostranog raskida ugovora od strane kluba tokom trudnoće ili porodiljskog odsustva došlo jer je igračica trudna ili će zatrudnjeti.

(5) Kad je ugovor raskinut iz razloga što je igračica trudna ili će zatrudnjeti, kao izuzetak od pravila koje se primjenjuje kod raskida ugovora bez opravdanog razloga, naknada koja pripada igračici izračunava se kako slijedi:

- a) u slučaju da igračica nije potpisala novi ugovor nakon raskida njenog prijašnjeg ugovora, kao opće pravilo, naknada je jednaka preostaloj vrijednosti ugovora koji je raskinut,
- b) u slučaju da je igračica potpisala novi ugovor do trenutka donošenja odluke, vrijednost novog ugovora za period koji odgovara vremenu koje je preostalo prema raskinutom ugovoru oduzima se od preostale vrijednosti ugovora koji je raskinut,
- c) pored prava iz tačaka a) i b) ovog stava, igračica ima pravo na dodatnu naknadu koja odgovara platama/naknadama za šest mjeseci prema raskinutom ugovoru.

(6) Ako relevantni zakonski propisi ili kolektivni ugovori koji su zaključeni između predstavnika poslodavaca i radnika na državnom/entitetskom nivou odstupaju od načela utvrđenih u stavu (4) ovog člana, primjenjuju se odredbe tog propisa ili ugovora.

Član 95.

Uz obavezu plaćanja naknade, klubu za kojeg se utvrdi da je jednostrano raskinuo ugovor iz razloga što je igračica trudna ili će zatrudnjeti, jer koristi porodiljsko odsustvo ili svoja druga materinska prava, izriču se sportske sankcije i to kazna zabrane registracije novih igračica u trajanju od dva uzastopna registracijska perioda, uz mogućnost kumulativnog izricanja novčane kazne.

Član 96.

(1) Za vrijeme trajanja ugovora, igračica koja zatrudni ima pravo na sljedeće:

- a) nastaviti izvršavati ugovorne obaveze prema klubu (tj. igranje i treniranje), ako njen ljekar i neovisni medicinski stručnjak (kojeg sporazumno izaberu igračica i njen klub) potvrde da je to za nju sigurno. U tom slučaju, klub je obavezan poštovati odluku i izraditi plan za nastavak izvršavanja ugovornih obaveza igračice na siguran način, dajući prioritet zdravlju igračice i njenog nerođenog djeteta,
- b) obavljati druge odgovarajuće poslove za klub ako ljekar igračice smatra da nije sigurno da igračica nastavi sa ugovornim obavezama ili ako igračica odabere da koristiti svoje pravo na nastavak izvršavanja ugovornih obaveza. U tim slučajevima, klub je obavezan poštovati odluku igračice te zajedno s igračicom izraditi plan za njene zamjenske poslove. Igračica ima pravo primati punu pripadajuću platu ili naknadu do početka korištenja porodiljskog odsustva,
- c) samostalno utvrditi datum početka svog porodiljskog odsustva, uzimajući u obzir utvrđene minimalne periode trajanja tog odsustva. Zabranjen je i kažnjiv bilo kakav pritisak na igračicu ili prisila da koristi porodiljsko odsustvo u određenom periodu,
- d) vratiti se nogometnim/fudbalskim aktivnostima nakon završetka porodiljskog odsustva na osnovu potvrde njenog ljekara te neovisnog medicinskog stručnjaka (kojeg sporazumno izaberu igračica i njen klub) da je to za nju sigurno. U tom slučaju klub je obavezan poštovati odluku igračice, ponovo je uključiti u nogometne/fudbalske aktivnosti te osigurati odgovarajuću i kontinuiranu zdravstvenu pomoć. Igračica ima pravo primati punu pripadajuću platu/naknadu nakon povratka nogometnim/fudbalskim aktivnostima.

(2) Igračici ima pravo na vrijeme za dojenje djeteta i/ili izdavanje za vrijeme izvršavanja sportskih, odnosno, ugovornih obaveza prema klubu, a obaveza klubova je da osiguraju za to prikladnu prostoriju.

(3) Klubovi su dužni u svakom trenutku poštovati potrebe igračica koje se odnose na njihov menstrualni ciklus i menstrualno zdravlje.

(4) Igračica ima pravo izostati s treninga ili utakmica kada to njeno menstrualno zdravlje zahtijeva, uz predočavanje valjane ljekarske potvrde izdate od strane njenog ginekolog ili ljekara specijaliste.

(5) Igračica ima pravo na punu naknadu plate kada koristi prava u vezi sa menstrualnim zdravljem.

XI UTICAJ TREĆE STRANE NA KLUBOVE I VLASNIŠTVO TREĆE STRANE NAD EKONOMSKIM PRAVIMA IGRAČA

Član 97.

(1) Nijedan klub ne smije potpisati ugovor koji omogućava bilo kojem drugom klubu ili bilo kojoj trećoj strani da u pitanjima vezanim za zapošljavanje i transfere utiče na njegovu neovisnost, poslovnu politiku ili nastupe njegovih ekipa.

(2) Nijedan klub niti igrač ne mogu zaključiti ugovor s trećom stranom prema kojem treća strana ima pravo učestvovati, potpuno ili djelimično, u naknadi koja je u vezi sa budućim transferom igrača iz jednog u drugi klub, ili su joj dodijeljena bilo kakva prava povezana s budućim transferom ili naknadom za transfer.

(3) Disciplinska komisija NS/FS BiH može izreći disciplinske sankcije klubovima i igračima koji se ne pridržavaju obaveza iz ovog člana.

XII NAKNADA ZA TRENIRANJE IGRAČA

Član 98.

(1) Naknada za treniranje igrača isplatiće se klubu, odnosno klubovima kod kojih je igrač bio registrovan kao amater pri potpisu prvog profesionalnog ugovora i to na ime troškova treniranja koje su klubovi imali od 12. pa do navršene 21. godine života igrača, kada se smatra da je igrač završio treniranje i to srazmjerno vremenu provedenom u klubu, odnosno u klubovima do 21. godine života, a pod uslovom da je igrač zaključio prvi profesionalnih ugovor s klubom najkasnije u kalendarskoj godini u kojoj je napunio 23 godine života.

(2) Kada igrač potpisuje naredne profesionalne ugovore, naknada za treniranje se isplaćuje samo prethodnom klubu.

Član 99.

U skladu sa ciljevima naknade za treniranje i naknade troškova za treniranje i razvoj igrača koji su klub, odnosno klubovi, imali za razvoj igrača, a imajući u vidu da su doprinosi klubova bili različiti, ovim Pravilnikom se utvrđuju sljedeći kriteriji za izračunavanje naknade za treniranje igrača, kod potpisa prvog profesionalnog ugovora, i to kako slijedi:

a) Kategorije igrača po dobi:

- 1) igrači od navršene 12. do navršene 15. godine života,
- 2) igrači od navršene 15. do navršene 18. godine života,
- 3) igrači od navršene 18. do navršene 21. godine života.

b) Kategorije klubova u domaćim (nacionalnim) transferima:

- 1) prva kategorija: klubovi Premijer/WWIN lige BiH,
- 2) druga kategorija: klubovi Prve lige NS F BiH i Prve lige FS RS,
- 3) treća kategorija: klubovi druge lige,
- 4) četvrta kategorija: klubovi opštinskih, kantonalnih/županijskih i područnih liga – ostali klubovi.

c) Kategorije klubova u međunarodnim (internacionalnim) transferima, u skladu sa kategorizacijom FIFA-e:

- 1) treća kategorija: klubovi Premijer/WWIN lige BiH;
- 2) četvrta kategorija: ostali klubovi.

Član 100.

(1) Izvršni odbor NS/FS BiH određuje visinu naknada za treniranje po osnovu godina života i po osnovu kategorije kluba, a u skladu sa odredbama ovog Pravilnika.

(2) Naknada u smislu ovog Pravilnika izračunava se na godine, mjesece i dane koliko je igrač proveo u klubu, u periodu od početka kalendarske godine u kojoj je napunio 12 godina, pa do kraja kalendarske godine u kojoj je napunio 21 godinu života, pod uslovom da je do dana 21. rođendana bio treniran u klubu, a po principu koji je utvrđen odlukom Izvršnog odbora NS/FS BiH o naknadama za treniranje igrača.

Član 101.

(1) Izvršni odbor NS/FS BiH, u odluci o visini naknade, a u smislu odredbi ovog Pravilnika, utvrđuje naknadu u rasponima po pojedinim elementima iz Pravilnika.

(2) Kada igrač potpiše profesionalni ugovor sa klubom Premijer/WWIN lige BiH, pravo na naknadu za treniranje igrača u prvom stepenu utvrđuje nadležni organ registracionog saveza kluba sa kojim je igrač potpisao ugovor, a u drugom stepenu Komitet za status igrača NS/FS BiH.

(3) Kada igrač potpiše profesionalni ugovor sa klubom nižeg stepena takmičenja, pravo na naknadu za treniranje igrača u prvom stepenu utvrđuje nadležni organ registracionog saveza kluba sa kojim je igrač potpisao ugovor, a u drugom stepenu komisije za status igrača entitetskih saveza.

Član 102.

(1) Visina naknade utvrđena u skladu sa ovim Pravilnikom uvećava se za procenat utvrđen odlukom Izvršnog odbora za igrače koji su nastupali u reprezentativnim selekcijama NS/FS BiH.

(2) Novi klub plaća utvrđeni iznos najkasnije u roku od 30 (trideset) dana od dana igračeve registracije.

Član 103.

Zahtjev za naknadu za treniranje klub podnosi najkasnije u roku od dvije godine od dana potpisivanja ugovora između igrača i novog kluba.

Član 104.

(1) Ukoliko je nemoguće utvrditi vezu između igrača i bilo kojeg od klubova koji su ga trenirali ili ukoliko se ti klubovi ne jave u roku od dvije godine od dana registracije igrača za klub koji je u obavezi isplatiti solidarni doprinos, naknada se plaća savezu (savezima) kluba (klubova) u kojem (kojima) je igrač bio treniran.

(2) Savez (savezi) ima pravo predmetnu naknadu potraživati u roku od šest mjeseci nakon proteka roka od dvije godine od dana registracije igrača.

Član 105.

(1) Kada je igrač amater prešao u drugi klub bez da je promijenio status, njegov bivši klub nema pravo na naknadu.

(2) Ukoliko igrač profesionalac stekne amaterski status, naknada za treniranje i razvoj se ne plaća.

(3) U slučaju da se igrač ponovno registruje kao profesionalac u roku od 30 (trideset) mjeseci od ponovnog sticanja amaterskog statusa, njegov novi klub plaća naknadu za treniranje i razvoj u skladu sa odredbama ovog Pravilnika.

(4) Izuzetno, na naknadu za treniranje i razvoj nema pravo onaj klub koji jednostranom izjavom bez opravdanog razloga raskine ugovor s igračem ili ako je nadležno tijelo za rješavanje sporova raskinulo ugovor na štetu kluba.

(5) Neplaćanje naknade za razvoj i treniranje igrača koji prelazi iz kluba u klub, ne utiče na pravo igrača da pristupi drugom klubu i da se za njega registruje po odredbama ovog Pravilnika.

(6) Odredbe ovog Pravilnika važe samo u slučaju domaćih transfera, odnosno kada igrač zaključi ugovor o radu sa klubom koji je član NS/FS BiH. Za sve međunarodne transfere igrača, direktno se primjenjuju odredbe FIFA Pravilnika o statusu i transferu igrača.

XIII MEHANIZAM SOLIDARNOSTI

1. Solidarni doprinos

Član 106.

(1) Ukoliko se dogodi transfer igrača profesionalca u toku trajanja njegovog ugovora, iznos od 5% bilo koje naknade, izuzimajući naknadu za treniranje plaćene prethodnom klubu, odbiće se od ukupnog iznosa ove naknade i novi klub će ga preraspodijeliti, kao solidarni doprinos klubu/klubovima koji su godinama bili uključeni u treniranje i obrazovanje igrača. Ovaj doprinos solidarnosti će odražavati broj godina (izračunato proporcionalno ako se radi o manje od jedne godine) u kojima je bio registrovan kod relevantnog kluba/klubova, između sezona svog 12. i 21. rođendana, prema kategorizaciji FIFA-e.

(2) Iznos po osnovu solidarnosti se isplaćuje neovisno od isplata naknada za treniranje, a obaveza traje tokom svih ugovora koje igrač potpisuje.

(3) Klubu kojem se isplaćuje naknada, odnosno obeštećenje, ne isplaćuje se iznos po osnovu solidarnosti.

(4) Posebne odredbe u vezi sa isplatama iznosa po osnovu mehanizma solidarnosti regulisane su FIFA Pravilnikom o statusu i transferu igrača.

XIV RJEŠAVANJE SPOROVA

1. Sporovi u vezi sa registracijom igrača

Član 107.

(1) Protiv svake registracije može se izjaviti pisani prigovor nadležnom savezu za registraciju, odnosno nadležnoj komisiji za status i transfer igrača predmetnog saveza.

(2) Prigovor mogu izjaviti svi članovi i sve organizacije NS/FS BiH.

(3) Prigovor ne utiče na pravo nastupa igrača sve do donošenja pravosnažne odluke nadležnog organa.

Član 108.

(1) Rok za izjavu prigovora je osam dana, računajući od dana objave registracije u odgovarajućem službenom glasniku.

(2) Uz prigovor se dostavlja i dokaz o uplati takse. Odredbe članova 121. i 127. ovog Pravilnika vezane za uplatu takse će se primjenjivati i kod podnošenja prigovora na registracije.

(3) Pri ocjeni blagovremenosti prigovora u obzir se uzima datum slanja preporučene pošiljke, poštanskog žiga ili datum neposrednog uručenja.

(4) Ukoliko prigovor nije podnesen blagovremeno, registracija ostaje na snazi.

Član 109.

Nadležna komisija za status i transfer dužna je odluku o prigovoru donijeti u roku od osam dana po prijemu prigovora. Odluka po prigovoru dostavlja se zainteresovanim stranama u pisanoj formi sa obrazloženjem.

Član 110.

(1) Protiv odluke donesene po prigovoru na registraciju ili ako odluka u prvom stepenu nije donesena u propisanom roku (šutnja administracije), nezadovoljna strana ima pravo uložiti žalbu drugostepenom organu u roku od osam dana od prijema odluke donesene po prigovoru, odnosno od dana kada je trebala biti donesena odluka prvostepenog organa.

(2) Drugostepeni organ po žalbi odluku donosi u roku od 30 (trideset) dana od dana prijema žalbe.

(3) Za rješavanje žalbi protiv odluka o prigovoru na registracije igrača čiji se klubovi takmiče u Premijer/WWIN ligi BiH, kao drugostepeni organ nadležan je Komitet za status igrača i transfere NS/FS BiH, a ako se radi o žalbama protiv odluka o prigovoru na registracije igrača čiji se klubovi takmiče u takmičenjima nižeg nivoa, nadležne su komisije za status i transfer igrača entitetskih saveza.

(4) Ukoliko je stranka uredno izvršila uplatu takse za vođenje prvostepenog postupka, a prvostepeni organ nije riješio po prigovoru stranke u utvrđenom roku, isti će biti dužan da izvrši povrat takse zbog nepostupanja po prigovoru stranke koja je taksu uplatila, u roku od osam dana od dana prijema zahtjeva stranke za povrat uplaćene takse.

(5) Drugostepeni organ je dužan donijeti odluku po žalbi ili zahtjevu za postupanje zbog šutnje administracije u roku do 30 (trideset) dana od dana podnošenja žalbe, odnosno zahtjeva. Ukoliko prvostepeni organ ne postupi u skladu sa stavom (4) ovog člana, drugostepeni organ će svojom odlukom naložiti prvostepenom organu povrat uplaćene takse.

Član 111.

(1) Registracija će biti poništena ili ispravljena kada nadležna komisija za status i transfer igrača za utvrdi da je prigovor ili žalba osnovana, a takva odluka postane pravosnažna.

(2) Registracija će biti poništena ako se na osnovu priloženih dokumenata utvrdi da igrač nije ispunjavao uslove za registraciju a takva registracija će se tretirati kao da nije niti postojala.

(3) Registracija će biti ispravljena ako se utvrdi da igrač ispunjava uslove za provođenje registracije ali da nije primijenjen odgovarajući član ovog Pravilnika, a igrač će imati pravo nastupa po prvobitno izvršenoj registraciji koja će biti ispravljena.

(4) Odluka o poništenju, odnosno ispravci registracije objavljuje se u službenom glasniku nadležnog registracionog saveza po njenoj pravosnažnosti.

Član 112.

(1) Ako dva ili više klubova podnesu dokumentaciju za registraciju istog igrača, nadležni organ za registraciju igrača igrača će izvršiti registraciju igrača za onaj klub za koji je igrač vremenski prije potpisao prijavu, a pravo nastupa teče od dana objave registracije.

(2) Ukoliko je igrač potpisao prijavu za dva ili više klubova, protiv igrača i kluba za koji je potpisao naknadnu prijavu biće preduzete disciplinske mjere prema odredbama Disciplinskog pravilnika NS/FS BiH.

2. Sporovi u vezi sa ugovorima

Član 113.

(1) Sporove koji nastaju u vezi sa ugovorima između igrača i klubova koji se takmiče u takmičenju Premijer/WWIN liga BiH, na zahtjev stranaka u prvom stepenu rješavaju komisije za status i transfer igrača nadležnog registracionog saveza, a po žalbi u drugom stepenu rješava Komitet za status igrača i transfere NS/FS BiH.

(2) Sporove koji nastaju u vezi sa ugovorima između igrača i klubova nižih nivoa takmičenja, na zahtjev ugovornih strana u prvom stepenu rješavaju komisije za status i transfer igrača nadležnog registracionog saveza, a u drugom stepenu po žalbi, komisije za status i transfer igrača entitetskih saveza. Uz zahtjev se dostavlja i dokaz o uplati takse. Odredbe članova 121. i 127. ovog Pravilnika vezane za uplatu takse će se primjenjivati i kod podnošenja zahtjeva za rješavanje sporova u vezi sa ugovorima.

(3) Nadležni organi neće rješavati sporove ako su prošle više od dvije godine od događaja koji je doveo do spora. U svakom pojedinačnom slučaju bit će ispitano da li je taj rok istekao.

(4) Nadležni prvostepeni organ dužan je donijeti odluku po zahtjevu u roku od 30 (trideset) dana od dana prijema zahtjeva. Odluka se dostavlja svim zainteresovanim stranama u pisanoj formi sa obrazloženjem.

(5) Protiv odluke prvostepenog organa, nezadovoljna stranka može uložiti žalbu drugostepenom organu u roku od osam dana od dana prijema prvostepene odluke.

Član 114.

(1) Ukoliko prvostepeni organ nije donio odluku po zahtjevu stranke u roku od 30 (trideset) dana po prijemu zahtjeva, nezadovoljna strana može izjaviti zahtjev za postupanje zbog šutnje administracije drugostepenom organu u roku od narednih osam dana, računajući od dana kad je trebalo biti odlučeno po podnesenom zahtjevu.

(2) Ukoliko je stranka uredno izvršila uplatu takse za vođenje prvostepenog postupka, a prvostepeni organ nije riješio po zahtjevu stranke u utvrđenom roku, isti će, biti dužan da izvrši povrat takse zbog nepostupanja po zahtjevu stranke koja je taksu uplatila, u roku od osam dana

od dana prijema zahtjeva stranke za povrat uplaćene takse.

(3) Drugostepeni organ je dužan donijeti odluku po žalbi ili zahtjevu za postupanje zbog šutnje administracije u roku do 30 (trideset) dana od dana podnošenja žalbe, odnosno zahtjeva. Ukoliko prvostepeni organ ne postupi u skladu sa stavom (2) ovog člana, drugostepeni organ će svojom odlukom naložiti prvostepenom organu povrat uplaćene takse.

(4) Prvostepena odluka postaje pravosnažna ukoliko po isteku žalbenog roka nijedna od strana u sporu nije uložila žalbu na prvostepenu odluku ili ako su se stranke pisanim putem odrekle prava na žalbu.

(5) Odluke drugostepenog organa su konačne te protiv istih nije dopuštena žalba.

3. Sporovi po osnovu zahtjeva za isplatu naknade za treniranje igrača

Član 115.

(1) Sporove u vezi zahtjeva za isplatu naknade za treniranje igrača koji se registruju za klubove koji se takmiče u takmičenju Premijer/WWIN liga BiH, u prvom stepenu rješava komisija za status i transfer igrača nadležnog registracionog saveza čiji je član novi klub, a u drugom stepenu po žalbama rješava Komitet za status i transfer igrača NS/FS BiH.

(2) Sporove u vezi zahtjeva za isplatu naknade za treniranje igrača koji se registruju za klubove koji se takmiče u nižim nivoima takmičenja, u prvom stepenu rješava nadležni organ registracionog saveza čiji je član novi klub, a u drugom stepenu komisije za status igrača entitetskih saveza.

Član 116.

(1) Zahtjevi u prvom stepenu se rješavaju u roku od 30 (trideset) dana od dana prijema zahtjeva. Uz zahtjev se dostavlja i dokaz o uplati takse. Odredbe članova 121. i 127. ovog Pravilnika vezane za uplatu takse će se primjenjivati i kod podnošenja zahtjeva za isplatu naknade za treniranje igrača.

(2) Nadležni organi neće rješavati sporove ako su prošle više od dvije godine od potpisa profesionalnog ugovora između igrača i novog kluba. U svakom pojedinačnom slučaju bit će ispitano da li je taj rok istekao.

(3) Nadležni prvostepeni organ dužan je donijeti odluku po zahtjevu u roku od 30 (trideset) dana od dana prijema zahtjeva. Odluka se dostavlja svim zainteresovanim stranama u pisanoj formi sa obrazloženjem.

Član 117.

(1) Protiv odluke prvostepenog organa nezadovoljna strana može uložiti žalbu drugostepenom organu u roku od osam dana od dana prijema prvostepene odluke.

(2) Žalbe u drugom stepenu se rješavaju u roku od 30 (trideset) dana od dana prijema žalbe.

(3) Ukoliko prvostepeni organ nije donio odluku po zahtjevu stranke u roku od 30 (trideset) dana po prijemu zahtjeva, nezadovoljna stranka može izjaviti zahtjev za postupanje zbog šutnje administracije drugostepenom organu u roku od narednih osam dana, računajući od dana kad je trebalo biti odlučeno po podnesenom zahtjevu.

(4) Ukoliko je stranka uredno izvršila uplatu takse za vođenje prvostepenog postupka, a prvostepeni organ nije riješio po zahtjevu stranke u utvrđenom roku, isti će, biti dužan da izvrši povrat takse zbog nepostupanja po zahtjevu stranke koja je taksu uplatila, u roku od osam dana od dana prijema zahtjeva stranke za povrat uplaćene takse.

(5) Drugostepeni organ je dužan donijeti odluku po žalbi ili zahtjevu za postupanje zbog šutnje administracije u roku do 30 (trideset) dana od dana podnošenja žalbe, odnosno zahtjeva. Ukoliko prvostepeni organ ne postupi u skladu sa stavom (4) ovog člana, drugostepeni organ će svojom odlukom naložiti prvostepenom organu povrat uplaćene takse.

4. Zajedničke odredbe vezane za prvostepene i drugostepene postupke pred nadležnim organima

Član 118.

(1) Prije pokretanja postupka prvostepeni i drugostepeni organi utvrđuju svoju nadležnost za vođenje postupka.

(2) Ako se organ iz stava 1. ovog člana oglasi nenadležnim za vođenje postupka, obavezan je odmah, a najkasnije u roku do pet dana, predmet dostaviti nadležnom organu.

(3) Sukob nadležnosti organa rješava zajednički neposredno viši organ.

Član 119.

(1) Nadležni organ neće pokrenuti postupak, nego će svojom odlukom odbaciti prigovor, zahtjev ili žalbu zbog sljedećih razloga:

- a) Ako je prigovor, zahtjev ili žalba podnesena od neovlaštenog lica,
- b) Kad radnja opisana u prigovoru, zahtjevu ili žalbi ne predstavlja povredu odredbi ovog Pravilnika,
- c) Ako se protiv lica iz određenih razloga ne može voditi postupak,
- d) Ako nadležni organ već vodi postupak ili je donio odluku u istom predmetu,
- e) Ako je nastupila zastara,
- f) Ako prigovor, zahtjev ili žalba nije adekvatno taksiran.

(2) Protiv odluke iz stava 1. ovog člana žalba nije dozvoljena.

Član 120.

(1) Rokovi predviđeni ovim Pravilikom ne mogu se produžavati.

(2) Rokovi u postupcima koji se vode po povredama ovog Pravilnika se računaju na sljedeći način:

- a) Ako se rok računa po danima, dan u kojem je izvršeno saopštavanje ili dostavljanje se ne računa u rok, nego se za početak roka računa prvi naredni dan,
- b) Na početak i tok roka ne utiče činjenica da su određeni dani neradni, ali ako posljednji dan roka pada u neradni dan, onda rok ističe sa protokom prvog narednog radnog dana,
- c) Kada je podnesak upućen putem pošte preporučenom pošiljkom, dan predaje pošti smatra se kao dan predaje onome kome je upućen.

(3) Ako je podnesak koji je vezan za rok, zbog neznanja ili očigledne greške podnosioca

predat ili upućen nadležnom organu prije isteka roka, pa nadležnom organu stigne poslije isteka roka, smatraće se da je na vrijeme podnesen.

Član 121.

(1) Taksa za vođenje postupka obavezno se plaća na:

- a) Sve prigovore i zahtjeve za rješavanje spornog odnosa,
- b) Žalbe podnesene protiv odluka prvostepenog organa,
- c) Zahtjev za zaštitu zakonitosti primjene Pravilnika.

(2) Visine taksi utvrđuju se odlukama izvršnih odbora registracionih i entitetskih saveza te odlukom Izvršnog odbora NS/FS BiH i objavljuju se u odgovarajućim službenim glasnicima.

Član 122.

(1) U postupcima rješavanja sporova stranama u postupku neće se priznavati posebni troškovi, izuzev troškova vještačenja i taksi za vođenje postupka.

(2) U sporovima koji se vode po zahtjevu profesionalnog igrača, pored drugih dokaza može se provesti i vještačenje putem sudskog vještaka finansijske struke. Troškove vještačenja akontativno, kao avans, plaća strana koja predlaže vještačenje, s tim što će plaćanje troškova, po okončanju postupka, predstavljati obavezu strane koja nije uspjela u sporu.

(3) Ako strana koja predlaže vještačenje akontativno ne uplati troškove vještačenja u ostavljenom roku, postupak će se obustaviti.

(4) U rješavanju sporova pred organima saveza neće se priznavati troškovi advokata niti obračunavati kamate.

Član 123.

(1) Nadležni organ na svojoj sjednici saslušava okrivljenog ili čita njegovo pisano očitovanje po prigovoru, zahtjevu ili žalbi, koje je na zahtjev nadležnog organa okrivljeni dužan dostaviti u roku od sedam dana od dana prijema poziva za dostavljanje očitovanja.

(2) Ukoliko okrivljeni ne dostavi pisano očitovanje po prigovoru, zahtjevu ili žalbi u roku iz stava (1) ovog člana, smatraće se da je saslušan.

Član 124.

(1) Teret dokazivanja je na podnosiocu prigovora, zahtjeva ili žalbe, koji je dužan da organu koji vodi postupak dostavi sva relevantna dokazna sredstva.

(2) Za dokazna sredstva prihvaćiće se relevantne isprave, svjedoci, vještaci te saslušanje stranaka ili njihove pisane izjave.

(3) Okrivljeni u toku postupka ima pravo zahtijevati da mu se predoče dokazi koji ga terete za povredu odredbi ovog Pravilnika.

(4) Izuzetno, nadležni organ će pravo iz stava (3) ovog člana uskratiti ukoliko je potrebno zaštititi povjerljivost predmeta ili za pravilno vođenje postupka ili zbog efikasnosti i ekonomičnosti postupka.

(5) Okrivljeni ima pravo zahtijevati da o svom trošku prisustvuje sjednici nadležnog organa radi dodatnog obrazloženja svoga očitovanja i za tu radnju može ovlastiti branioca.

Član 125.

Prvostepeni postupak mora biti okončan donošenjem odluke u rokovima predviđenim

ovim Pravilnikom, računajući od dana podnošenja prijave odnosno zahtjeva za pokretanje postupka.

Član 126.

(1) Postupak pred nadležnim organom se završava donošenjem odluke.

(2) Postupak pred nadležnim organom će se obustaviti ako se utvrdi da nema dokaza da je povreda Pravilnika počinjena.

Član 127.

(1) Drugostepeni organ će odbaciti žalbu kao neblagovremenu, nedopuštenu ili nepotpunu ako je to propustio da učini prvostepeni organ.

(2) Rješavajući o žalbi, drugostepeni organ može odluku prvostepenog organa potvrditi, preinačiti ili ukinuti.

(3) Drugostepeni organ će odbiti žalbu i potvrditi prvostepenu odluku kada utvrdi da ne postoje razlozi zbog kojih se odluka pobija ili da nema drugih razloga zbog kojih se odluka može ukinuti ili preinačiti.

(4) Drugostepeni organ će preinačiti prvostepenu odluku ako utvrdi da je proveden postupak iako su postojali razlozi za njegovo obustavljanje, ako utvrdi da je u prvostepenom postupku činjenično stanje pravilno utvrđeno, ali da se ima donijeti drugačija odluka ili ako nađe da postoje takve povrede pravilnika koje se mogu otkloniti bez ukidanja prvostepene odluke ili da nisu uzete u obzir okolnosti koje su od uticaja na pravilno donošenje odluke ili ako okolnosti koje se uzete u obzir nisu pravilno ocjenjene, kao i kada nađe da je prvostepeni organ pogrešno ocijenio isprave i dokaze koje nije sam izveo, a odluku je zasnovao na tim dokazima.

(5) Drugostepeni organ će ukinuti prvostepenu odluku i predmet vratiti na ponovni postupak ako utvrdi da postoji povreda postupka koja je bila ili mogla biti od uticaja na zakonito rješavanje pravne stvari ili ako nađe da zbog pogrešno i nepotpuno utvrđenog činjeničnog stanja treba provesti novi postupak.

(6) Drugostepeni organ će ukinuti prvostepenu odluku kada utvrdi da ju je donio stvarno nenadležni organ i predmet uputiti stvarno nadležnom organu.

(7) Prvostepeni organ kojem je predmet vraćen na ponovni postupak dužan je da izvede sve radnje i raspravi sva pitanja na koja je ukazao drugostepeni organ.

(8) Drugostepeni postupak mora biti okončan u roku od 30 (trideset) dana od dana prijema žalbe, osim kada je usljed opravdanih okolnosti neophodno produžiti prednje navedeni rok, a koji ne može biti duži od dodatnih 30 (trideset) dana.

(9) Za vođenje sporova pred prvostepenim i drugostepenim organima moraju se uplatiti takse. Uz prigovore, zahtjev za rješavanje spora ili žalbu mora se priložiti i dokaz o plaćenju taksi u visini koja je utvrđena odlukom Izvršnog odbora NS/FS BiH, odlukama entitetskih saveza ili odlukama nadležnih registracionih saveza.

(10) Ako taksa nije plaćena, podnosilac prigovora, zahtjeva ili žalbe će se pozvati da istu uplati u roku od 48 (četrdesetosam) sati.

(11) Ukoliko u roku propisanom prethodnim stavom podnosilac prigovora, zahtjeva ili žalbe ne uplati taksu, prigovor, zahtjev ili žalba će se odbaciti.

(12) Ukoliko je drugostepeni organ po žalbi jedne stranke ukinuo prvostepenu odluku i

premet vratio prvostepenom organu na ponovni postupak pa ista stranka ponovo podnese žalbu protiv odluke prvostepenog organa u ponovljenom postupku ta stranka nije dužna ponovo uplatiti taksu za vođenje drugostepenog postupka.

(13) Odluke drugostepenih organa su konačne i protiv istih žalba nije dopuštena.

XV ZAHTJEV ZA ZAŠTITU ZAKONITOSTI PRIMJENE PRAVILNIKA

Član 128.

(1) Na sve vrste sporova u kojima se pojavljuju profesionalni igrači i klub koji su završeni u prvostepenom i/ili drugostepenom postupku (odluke postale pravosnažne) nezadovoljna stranka može putem Pravnog komiteta NS/FS BiH podnijeti Izvršnom odboru NS/FS BiH zahtjev za zaštitu zakonitosti primjene ovog Pravilnika i drugih akata NS/FS BiH te akata nogometnih/fudbalskih saveza entiteta.

(2) Zahtjev se podnosi u roku od 30 (trideset) dana po prijemu drugostepene odluke uz obaveznu uplatu takse čija visina je utvrđena Odlukom Izvršnog odbora NS/FS BiH. Odredbe članova 121. i 127. ovog Pravilnika vezane za uplatu takse će se primjenjive kod podnošenja zahtjeva za zaštitu zakonitosti primjene pravilnika.

(3) Neblagovremen, nedopušten i nepotpun zahtjev će se odbaciti.

(4) Zahtjev za zaštitu zakonitosti primjene Pravilnika ne može se podnositi protiv konačnih odluka u sporovima koji se odnose na igrače amatere.

XVI ODREDBE O FUTSALU

Član 129.

Igrač registrovan za nogomet/fudbal može biti registrovan i za klub u futsalu.

Član 130.

(1) Igrač futsala može biti registrovan kao amater ili kao profesionalac i na istog se primjenjuju odredbe ovog Pravilnika koji se odnose na profesionalce i amatere.

(2) Ako ovim Pravilnikom ili FIFA Pravilnikom o statusu i transferu igrača nije drugačije određeno za pojedine odnose, odredbe ovog Pravilnika primjenjuju se na klubove i igrače za futsal.

Član 131.

Za igrače futsala ne primjenjuju se odredbe ovog Pravilnika koje se odnose na registracione periode, pravo na naknadu za treniranje igrača, kao i pravo na doprinos solidarnosti. Izvršni odbor NS/FS BiH će posebno utvrditi registracijske periode za ovu kategoriju igrača.

XVII ODREDBE O ŽENSKOM NOGOMETU/FUDBALU

Član 132.

(1) Ako ovim Pravilnikom ili FIFA Pravilnikom o statusu i transferu igrača nije drugačije određeno za pojedine odnose, odredbe ovog Pravilnika primjenjuju se na klubove i igrače ženskog nogometa/fudbala.

(2) Izuzetno, od pravila vezanih za registraciju i pravo nastupa stranih igrača, igračica

državljanica države koja graniči sa BiH koja se nalazi na redovnom školovanju u toj državi, može biti registrovana za klub kao amater i imati pravo nastupa bez boravišne dozvole, ukoliko u zakonskom roku do 72 (sedamdesetdva) sata može nastupiti za klub u kojem je registrovana i napustiti teritoriju BiH. U tom slučaju, klub je dužan pisanim putem obavijestiti nadležni registracioni savez o istom te pored dokumentacije za registraciju predviđene ovim Pravilnikom dostaviti i dokaz o redovnom školovanju igračice.

Član 133.

(1) Odredbe ovog Pravilnika o naknadi za treniranje ne primjenjuju se na ženski nogomet/fudbal.

(2) Izvršni odbor NS/FS BiH može svojom odlukom utvrditi posebne uslove u vezi naknade za treniranje igrača ženskog nogometa/fudbala.

XVIII PUŠTANJE IGRAČA ZA REPREZENTATIVNE EKIPE

Član 134.

Klubovi su obavezni puštati svoje registrovane igrače da nastupaju za reprezentativne ekipe, a u skladu sa Aneksom 1 FIFA Pravilnika o statusu i transferu igrača.

XIX PRELAZNE I ZAVRŠNE ODREDBE

Član 135.

(1) Ovaj Pravilnik stupa na snagu i primjenjuje se danom donošenja.

(2) Stupanjem na snagu ovog Pravilnika prestaju da važe odredbe Pravilnika o registracijama klubova i igrača i statusu i transferu igrača NS/FS BiH, usvojenog na sjednici Izvršnog odbora NS/FS BiH, održanoj 20.06.2023. godine.

(3) Sporovi koji su započeti, a nisu riješeni do stupanja na snagu ovog Pravilnika će se rješavati prema odredbama Pravilnika od 20.06.2023. godine.

(4) Odredbe vezane za posljedice pandemije COVID-19 će se brisati kada prestane potreba za njihovim postojanjem.

Član 136.

(1) Ugovori zaključeni prije stupanja na snagu ovog Pravilnika su važeći.

(2) Ugovori zaključeni po stupanju na snagu ovog Pravilnika, a koji su suprotni odredbama ovog Pravilnika ili su suprotni obaveznim propisima pravnog sistema BiH, odnosno entiteta, smatrat će se ništavim u dijelu u kojem su u suprotnosti sa odredbama navedenih propisa.

(3) Disciplinske sankcije u smislu ovog Pravilnika su propisane Disciplinskim pravilnikom NS/FS BiH.

(4) U slučaju neusklađenosti bilo koje odredbe ovog Pravilnika i FIFA Pravilnika o statusu i transferu igrača primjenjuju se odredbe FIFA Pravilnika o statusu i transferu igrača.

(5) Sve što nije regulisano ovim Pravilnikom, rješavat će se u skladu sa Statutom NS/FS

BiH i u skladu sa FIFA Pravilnikom o statusu i transferu igrača te drugim relevantnim FIFA propisima.

Član 137.

Pri tumačenju ovog Pravilnika mora se polaziti od slijedećih principa:

1. Da se ugovori moraju poštovati,
2. Načelo da u slučaju opravdanog razloga svaka strana može raskinuti ugovor bez posljedica,
3. Da profesionalci mogu raskidati ugovore iz sportski opravdanog razloga,
4. Da se ugovori ne mogu raskinuti za vrijeme trajanja sezone,
5. Da se u slučaju raskida ugovora bez opravdanog razloga plaća naknada i da takva naknada može biti regulisana ugovorom,
6. Da će se u slučaju raskida ugovora bez opravdanog razloga izreći sportske sankcije strani koja je raskinula ugovor,
7. Da kod jednostranog raskida ugovora štetne posljedice snosi strana koja je ugovor raskinula,
8. Da se igraču ne može raskinuti ugovor dok traje medicinska rehabilitacija,
9. Da se obavezna naknada za treniranje igrača plaća kod transfera profesionalnih igrača dok igrač ne navrši 23 godine života,
10. Poslije navršene 23 godine života obeštećenje se plaća ako se ugovor raskida u toku njegovog trajanja, bez obzira na godine života igrača;
11. Da opravdanost raskida ugovora cijene organi NS/FS BiH, odnosno entitetski savezi, ako se igrač i klub ne mogu dogovoriti;
12. Da se odredbe o mehanizmu solidarnosti primjenjuju u skladu sa propisima FIFA-e;
13. Da odredbe ovog Pravilnika može mijenjati samo izvršni odbor NS/FS BiH.

Član 138.

Za autentično tumačenje ovog Pravilnika nadležan je Komitet za status igrača i transfere NS/FS BiH uz mogućnost traženja mišljenja od Pravnog komiteta NS/FS BiH.

PREDSJEDNIK
Vico Zeljković